CBETA電子佛典集成

CBETA Chinese Electronic Tripitaka Collection ebook

T16n0663

金光明經

北涼 曇無讖譯

目次

- 編輯說明
- 章節目次
 - 。序
 - 。1 序品(一)
 - 2 壽量品(一)
 - 3 懺悔品(一)
 - 4 讚歎品(一)
 - 。 5 空品(一)
 - 。 <u>6 四天王品(二)</u>
 - · 7_ 大辯天神品(二)
 - · <u>8</u> 功德天品(二)
 - 。 9 堅牢地神品(二)
 - · 10 散脂鬼神品(三)
 - 11 下論品(三)
 - 12 善集品(三)
 - 13 鬼神品(三)
 - · 14_授記品(三)
 - · 15 除病品(三)
 - · 16 流水長者子品(四)
 - · 17 捨身品(四)
 - 18 讚佛品(四)
 - 19 囑累品(四)
- 卷目次
 - · 001
 - 002
 - · 003
 - · <u>004</u>
- 贊助資訊

編輯說明

- 本電子書以「CBETA 電子佛典集成 Version 2023. Q1」為資料來源。
- 漢字呈現以 Uni code 3.0 為基礎,不在此範圍的字則採用組 字式表達。
- 梵文悉曇字及蘭札字均採用羅馬轉寫字,如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題,歡迎來函 service@cbeta, org 回報。
- <u>版權所有</u>,歡迎自由流通,但禁止營利使用。

No. 663 [Nos. 664, 665]

金光明經序

真定府十方洪濟禪院住持傳法慈覺大師宗蹟述

夫靈心絕待,泯萬物而獨存。妙行難思,諸緣普現,則實際理地雖不受於一毫,而事相門中不捨於一法。故如來出世,說《金光明經》,依清淨心,建解脫行,顯出塵之經卷,永廓迷情;示伏藏之寶王,頓圓大用。夫以信相為起教之人,則菩薩無滯空之行;於堅牢有贊空之頌,則法身非有相之求。性相該通,有無互建,則一經之要義在於斯。至於明諸佛法性之源,探如來壽量之本,金光普照,發揚一切智門;金鼓騰聲,顯示無邊妙用,則菩薩發行之源也。懺除罪障,本如夢之法門;讚歎如來,舉修行之妙果。摩訶薩埵之飼虎,能捨能行;長者流水之濟魚,有始有卒,則菩薩依真之行也。譬之明月當天,影沈眾水,真金作器,體應萬形,主伴圓融,一多自在,能於一法,受一切法,則信如來之祕藏,實為三界之寶乘,莊嚴性海之門,趣向覺王之本。是以十千天子,聞而頓證於菩提;一切眾生,入者皆同於甘露,則見聞隨喜,讀誦受持,於一念具了無上法門者,豈小緣哉。凡我同儔,勉思佛意。元豐四年三月十五日序。

金光明經卷第一

北涼三藏法師曇無讖譯

金光明經序品第一

如是我聞:

一時佛住王舍大城耆闍崛山。是時如來遊於無量甚深法性諸佛行處,過諸菩薩所行清淨。

是金光明, 諸經之王! 若有聞者, 則能思惟, 無上微妙, 甚深之義。 四佛世尊, 如是經典, 常為四方, 東方阿閦、 之所護持: 南方簪相、 北微妙聲。 我今當說, 西無量壽、 懺悔等法, 所生功德, 為無有上; 盡不善業, 能壞諸苦, 一切種智, 而為根本; 無量功德, 之所莊嚴;

滅除諸苦, 與無量樂。 諸根不具、 壽命損減、 貧窮困苦、 諸天捨離、 王法所加、 各各盆諍、 親厚鬪訟、 愁憂恐怖、 財物損耗、 惡星災異、 臥見惡夢、 眾邪蠱道、 變怪相續、 書則愁惱, 當淨洗浴, 聽是經典。 專聽諸佛, 著淨絜衣, 至心清淨, 是經威德, **某深行**處。 能悉消除, 如是諸惡, 令其寂滅。 護世四王、 夜叉之眾, 將諸官屬、 并及無量, 悉來擁護, 持是經者。 大辯天神、 尼連河神、 鬼子母神、 地神堅牢、 三十三天、 大梵尊天、 大神龍干、 緊那羅王、 **鉫樓羅王、** 阿修羅王、 與其眷屬, 悉共至彼, 擁護是人, 書夜不離。 我今所說, 諸佛世尊, 甚深祕密, 微妙行處, 億百千劫, 基難得值。 若得聞經、 若為他說、 若心隨喜、 若設供養, 如是之人, 常為諸天、 於無量劫, 八部所敬。 生功德者, 得不思議, 如是修行, 亦為十方, 諸佛世尊、 無量福聚; 之所護持。 深行菩薩, 著淨衣服, 慈心供養, 以上妙香, 常不遠離; 歡喜悅豫, 身意清淨, 無諸垢穢, 若得聽聞, 深樂是典。 當知善得, 人身人道, 若聞懺悔, 及以正命; 執持在心, 是上善根, 諸佛所讚。

金光明經壽量品第二

爾時王舍城中,有菩薩摩訶薩名曰信相,已曾供養過去無量億那由他百千諸佛,種諸善根。是信相菩薩作是思惟:「何因何緣,釋迦如來壽命短促方八十年?」復更念言:「如佛所說,有二因緣壽命得長。何等為二?一者不殺、二者施食。而我世尊,於無量百千億那由他阿僧祇劫,修不殺戒、具足十善,飲食惠施不可限量,乃至己身骨髓肉血,充足飽滿飢餓眾生,況餘飲食。」

大士如是至心念佛,思是義時,其室自然廣博嚴事,天紺琉璃種種 眾寶,雜廁間錯以成其地,猶如如來所居淨土,有妙香氣過諸天 香, 煙雲垂布遍滿其室。其室四面, 各有四寶上妙高座自然而出, 純以天衣而為敷具,是妙座上各有諸佛所受用華,眾寶合成。於蓮 華上有四如來:東方名阿閦、南方名寶相、西方名無量壽、北方名 微妙聲,是四如來自然而坐師子座上,放大光明照王舍城,及此三 千大千世界,乃至十方恒河沙等諸佛世界,雨諸天華作天妓樂。 爾時三千大千世界所有眾生,以佛神力受天快樂,諸根不具即得具 足。舉要言之,一切世間所有利益,未曾有事悉具出現。 爾時信相菩薩,見是諸佛及希有事,歡喜踊躍恭敬合掌,向諸世尊 至心念佛,作是思惟:「釋迦如來無量功德,唯壽命中心生疑惑。 云何如來壽命如是方八十年?」 爾時四佛,以正遍知告信相菩薩:「善男子!汝今不應思量如來壽 命短促。何以故?善男子!我等不見諸天、世人、魔眾、梵眾、沙 門、婆羅門、人及非人,有能思算如來壽量知其齊限,唯除如 來。」時四如來,將欲宣暢釋迦文佛所得壽命,欲色界天、諸龍鬼 神、乾闥婆、阿脩羅、迦樓羅、緊那羅、摩睺羅伽,及無量百千億 那由他菩薩摩訶薩,以佛神力悉來聚集信相菩薩摩訶薩室。 爾時四佛,於大眾中略以偈喻說釋迦如來所得壽量,而作頌曰:

「一切諸水, 可知幾滴, 無有能數, 諸須彌山, 可知斤兩, 釋尊壽命。 無有能量, 釋尊壽命。 一切大地, 無有能算, 釋尊壽命。 可知塵數, 尚可盡邊, 無有能計, 虚空分界, 釋尊壽命。 不可計劫, 億百千萬, 佛壽如是, 無量無邊。 以是因緣, 故說二緣, 不害物命、 施食無量。 是故大士, 壽不可計, 無量無邊, 亦無齊限。 是故汝今, 不應於佛, 而牛疑惑。」 無量壽命,

爾時信相菩薩摩訶薩,聞是四佛宣說如來壽命無量,深心信解歡喜踊躍。說是如來壽量品時,無量無邊阿僧祇眾生,發阿耨多羅三藐三菩提心。時四如來忽然不現。

金光明經懺悔品第三

爾時信相菩薩,即於其夜夢見金鼓,其狀姝大,其明普照喻如日光;復於光中得見十方無量無邊諸佛世尊,眾寶樹下坐琉璃座,與無量百千眷屬圍繞而為說法。見有一人似婆羅門,以枹擊鼓出大音聲,其聲演說懺悔偈頌。

時信相菩薩,從夢寤已,至心憶念夢中所聞懺悔偈頌,過夜至旦出 王舍城。爾時亦有無量無邊百千眾生,與菩薩俱往耆闍崛山至於佛 所。至佛所已,頂禮佛足右繞三匝,却坐一面敬心合掌,瞻仰尊顏 目不暫捨,以其夢中所見金鼓及懺悔偈,向如來說:

至心憶持。 夢見金鼓, 「昨夜所夢, 其光大盛, 妙色晃耀, 明踰於日, 遍照十方, 恒沙世界。 又因此光, 眾寶樹下, 得見諸佛, 华琉璃座, 無量大眾, 圍繞說法。 見婆羅門, 其鼓音中, 說如是偈: 擊是金鼓, 『是大金鼓, 所出妙音, 悉能滅除, 三世諸苦, 地獄餓鬼、 畜生等苦, 貧窮困苦、 及諸有苦。 是鼓所出, 微妙之音, 能除眾生, 諸惱所逼, 斷眾怖畏, 令得無懼, 猶如諸佛, 得無所畏。 諸佛聖人, 所成功德, 到大智岸; 如是眾生, 離於生死, 定及助道, 猶如大海。 所得功德, 今眾牛得, 是鼓所出, 如是妙音, 梵音深遠; 證佛無上, 菩提勝果; 轉無上輪, 微妙清淨; 住壽無量, 利益眾生; 不思議劫; 演說正法, 消除諸苦; 能害煩惱, 貪瞋癡等, 若有眾生, 悉令寂滅。 處在地獄, 大火熾然, 燒炙其身。 若聞金鼓, 即尋禮佛。 微妙音聲, 所出言教, 亦令眾生, 得知宿命, 百生千生、 千萬億牛; 令心正念, 諸佛世尊; 亦聞無上, 微妙之言。 是金鼓中, 所出妙音, 復令眾生, 值遇諸佛; 善修無量, 猿離一切, 諸惡業等; 諸天世人、 白淨之業。 及餘眾生, 諸所願求, 隨其所思, 如是金鼓, 所出之音, 皆悉能令, 成就具足。

若有眾生, 墮大地獄, 猛火炎熾, 焚燒其身, 流轉諸難, 無有救護, 當今是等, 悉滅諸苦。 若有眾生, 諸苦所切, 及以人中, 三惡道報, 所出之音, 如是金鼓, 悉能滅除, 一切諸苦。 無依無歸, 無有救護, 我為是等, 作歸依處。 是諸世尊, 生大悲心, 今當證知, 久已於我, 在在處處, 十方諸佛, 現在世雄, 兩足之尊, 我本所作, 惡不善業, 今者懺悔: 諸十力前, 不識諸佛、 浩作眾惡; 及父母恩; 不解善法、 自恃種姓、 及諸財寶; 盛年放逸、 作諸惡行; 心念不善, 口作惡業; 隨心所作, 不見其過; 凡夫愚行, 無知闇覆, 親近惡友, 煩惱亂心; 五欲因緣, 心生忿恚, 不知厭足, 故作眾惡; 親近非聖, 因牛慳嫉, 貧窮因緣, 姦諂作惡; 繋屬於他, 常有怖畏, 不得自在, 而浩諸惡。 擾動其心, 渴愛所逼, 貪欲恚癡, 造作眾惡; 依因衣食, 及以女色, 諸結惱熱, 造作眾惡; 身口意惡, 如是眾罪, 今悉懺悔。 所集三業, 或不恭敬, 如是眾罪, 佛法聖眾, 或不恭敬, 緣覺菩薩, 今悉懺悔。 如是眾罪, 今悉懺悔。 以無智故, 誹謗正法; 不知恭敬, 父母尊長; 如是眾罪, 今悉懺悔。 愚惑所覆, 造作諸惡; 驕慢放逸, 因 書縣, 如是眾罪, 今悉懺悔。 我今供養, 無量無邊, 三千大千, 世界諸佛; 我當拔濟, 無量眾生, 十方一切, 所有諸苦; 我當安止, 不可思議, 令住十地; 已得安止, 阿僧祇眾, 住十地者, 悉令具足, 如來下覺。 為一眾生, 億劫修行, 使無量眾, 今度苦海; 我當為是, 諸眾牛等,

演說微妙, **其**深悔法。 所謂金光, 千劫所作, 滅除諸惡, 極重惡業, 一懺悔者, 如是眾罪, 若能至心, 我今已說, 懺悔之法, 悉皆滅盡。 速能滅除, 是金光明, 清淨微妙, 一切業障; 我當安止, 住於十地, 以為脚足, 成佛無上, 十種珍寶, 令諸眾生, 功德光明, 度三有海。 諸佛所有, 甚深法藏, 不可思議, 願悉具足; 一切種智, 無量功德, 百千禪定、 根力覺道, 不可思議, 諸陀羅尼, 十力世尊, 我當成就。 諸佛世尊, 有大慈悲, 當證微誠, 所作眾惡, 哀受我悔。 若我百劫, 生大憂苦, 以是因緣, 貧窮困乏、 怖畏惡業、 心常怯劣, 愁熱驚懼、 暫無歡樂; 在在 虚虚, 十方現在, 大悲世尊, 能除眾生, 一切怖畏, 令我恐懼, 願當受我, 誠心懺悔, 悉得消除; 我之所有, 煩惱業垢, 諸佛世尊, 惟願現在, 以大悲水, 洗除令淨。 過去諸惡, 今悉懺悔; 誠心發露; 現所作罪, 所未作者, 更不敢作; 已作之業; 不敢覆藏。 口業有四, 意三業行, 身業三種, 身口所作, 今悉懺悔; 及以意思, 十種惡業, 一切懺悔。 猿離十惡, 安止十住, 逮十力尊, 修行十善, 所浩惡業, 應受惡報, 今於佛前, 及餘世界, 若此國十、 誠心懺悔。 所有善法, 悉以迴向, 我所修行, 身口意業, 願於來世, 證無上道。 若在諸有, 六趣險難, 愚癡無智, 造作眾惡, 今於佛前, 皆悉懺悔。 世間所有, 生死險難, 種種婬欲, 如是諸難, 我今懺悔。 愚煩惱難, 近惡友難, 心輕躁難、 三有險難, 及三毒難、 遇無難難、 值好時難、

修功德難、 值佛亦難, 如是諸難, 我所依止, 今悉懺悔。 諸佛世尊, 是故我今, 敬禮佛海; 金色晃耀, 猶如須彌, 是故我今, 頂禮最勝, 其色無上, 如天真金; 眼目清淨, 如紺琉璃; 功德威神, 名稱顯著; 佛日大悲, 滅一切闇; 善淨無垢, 離諸塵翳, 無上佛日, 大光普照; 煩惱火熾, 令心焦熱, 唯佛能除, 三十二相, 如月清涼; 八十種好, 莊嚴其身, 視之無厭; 功德巍巍, 明網顯耀, 安住三界, 如日照世; 猶如琉璃, 淨無瑕穢, 妙色廣大, 其色紅赤, 如日初出, 種種各異; 校飾光網, 頗梨白銀, 如是種種, 莊嚴佛日。 三有之中, 生死大海, 惱亂我心, 其味苦毒, 潦水波蕩, 最為麁澁; 如來網明, 能令枯涸。 妙身莊嚴, 相好殊特, 金色光明, 智慧大海, 彌滿三界, 遍照一切, 如大海水, 是故我今, 稽首敬禮。 其量難知, 大地微塵, 不可稱計; 諸須彌山, 難可度量, 虚空邊際, 亦不可得; 諸佛亦爾, 功德無量。 一切有心, 無能知者。 於無量劫, 極心思惟, 不能得知, 佛功德邊。 大地諸山, 尚可知量; 毛滴海水, 亦可知數; 諸佛功德, 無能知者。 如是功德, 相好莊嚴, 名稱讚歎, 令眾皆得。 諸因緣故, 我以善業, 來世不久, 成於佛道, 講宣妙法, 利益眾生, 度脫一切, 無量諸苦; 摧伏諸魔、 及其眷屬, 轉於無上, 清淨法輪; 不思議劫; 住壽無量, 充足眾生, 甘露法味; 我當具足, 猶如渦佛, 六波羅蜜, 之所成就; 悉滅貪欲, 斷諸煩惱, 除一切苦, 及恚癡等; 我當憶念, 宿命之事,

百生千生、 千萬億生, 常當至心, 正念諸佛, 所說微妙, 無上正法。 常值諸佛, 遠離諸惡, 我因善業, 修諸善業; 一切世界, 所有眾生, 無量苦惱, 若有眾生, 我當悉滅。 諸根毀壞, 不具足者, 悉令具足; 十方世界, 所有病苦, 羸瘦頓乏、 悉令解脫, 如是諸苦, 無救護者, 平復如本。 若犯王法, 還得勢力, 無量怖畏, 愁憂苦惱, 臨當刑戮, 悉令解脫。 若受鞭撻, 如是之人, 繋縛枷鎖, 種種苦事, 逼切其身, 愁憂驚畏, 種種恐懼, 無量百千, 擾亂其心; 如是無邊, 諸苦惱等, 悉得解脫。 願使一切, 若有眾生, 令得種種, 甘美飲食。 飢渴所惱, 盲者得視; 壟者得聽; 貧窮之者, 裸者得衣; 即得寶藏, 倉庫盈溢, 無所乏少; 一切皆受, 安隱快樂, 一人受苦。 乃至無有, 形貌端嚴, 眾生相視, 和顏悅色, 人所喜見。 心常思念, 他人善事; 飲食飽滿, 隨諸眾生, 功德具足。 之所思念, 皆願令得, 種種妓樂: 琴瑟鼓吹, 箜篌筝笛、 如是種種, 流泉諸水, 微妙音聲。 江河池沼、 及優鉢羅。 隨諸眾生, 金華遍布, 之所思念, 即得種種, 衣服飲食、 錢財珍寶、 金銀琉璃、 直珠璧玉、 願諸眾生, 不聞惡聲, 雜廁瓔珞。 乃至無有, 可惡見者。 願諸眾生, 色貌微妙, 各各相於, 共相愛念; 世間所有, 資生之具, 隨其所念, 悉令具足。 願諸眾生, 諸所求索, 如其所須, 應念即得; 香華諸樹, 常於三時, 雨細末香, 及塗身香; 願諸眾生, 眾生受者, 歡喜快樂。 常得供養, 十方諸佛, 不可思議,

```
無上妙法,
       清淨無垢,
               及諸菩薩、
聲聞大眾。
       願諸眾生,
               常得遠離,
三惡八難,
               觀親諸佛,
       值無難處,
無上之王。
       願諸眾生,
               常生尊貴,
       安隱豐樂;
多饒財寶,
               上妙色像,
莊嚴其身,
       功德成就,
               有大名稱。
       皆成男子,
願諸女人,
               具足智慧,
       一切皆行,
精勤不懈;
               菩薩之道,
勤心修習,
               常見十方,
       六波羅密;
無量諸佛;
       坐寶樹下,
               琉璃座上,
       自在快樂,
               演說正法,
安住禪定,
眾所樂聞。
               及猧去世,
       若我現在,
               應得惡果,
所作惡業,
       諸有險難,
不適意者,
               令無有餘。
       願悉滅盡,
若諸眾生,
       三有繋縛,
               牛死羅網,
       願以智刀,
彌密堅固,
               割斷破裂,
除諸苦惱,
               若此閻浮,
       早成菩提。
       無量世界,
               所有眾生,
及餘他方,
               我今深心,
       善妙功德,
所作種種,
       我今以此,
隨其歡喜。
               隨喜功德,
及身口意,
       所作善業,
               願於來世,
       得淨無垢,
               吉祥果報。
成無上道,
       讚歎十力,
若有敬禮,
               信心清淨,
               所說懺悔,
無諸疑網,
       能作如是,
               諸善男子,
便得超越,
       六十劫罪。
       諸王剎利、
               婆羅門等,
及善女人,
               稱歎如來,
若有恭敬,
       合掌向佛,
并讚此偈,
       在在牛處,
               常識宿命,
諸根具足,
       清淨端嚴,
               種種功德,
悉皆成就;
       在在處處,
               常為國王、
       之所恭敬;
輔相大臣,
               非於一佛、
万佛十佛,
       種諸功德。
               聞是懺悔,
若於無量,
               諸佛如來,
       百千萬億,
               聞是懺悔。』」
種諸善根,
       然後乃得,
```

金光明經讚歎品第四

爾時佛告地神堅牢:「善女天!過去有王名金龍尊,常以讚歎,讚 歎去來現在諸佛:

「『我今尊重, 敬禮讚歎, 去來現在, 十方諸佛。 諸佛清淨, 微妙寂滅, 於諸聲中, 色中上色, 金光照耀; 佛磬最上, 猶如大梵, 深遠雷音; 蜂翠孔雀, 其髮紺黑, 光螺焰起, 猶如珂雪, 色不得喻; 其齒鮮白, 顯發金額, 分齊分明; 其目脩廣, 如青蓮華, 映水開敷; 清淨無垢, 舌相廣長, 形色紅輝, 光明照耀, 如華初牛; 眉間臺相, 白如珂月, 右旋潤澤, 眉細脩揚, 如淨琉璃; 其色黑耀, 渦於蜂干; 形如月初, 如鑄金銋, 鼻高圓直, 微妙柔軟, 當于面門; 如來勝相, 次第最上, 無與等者; 得味直下, ·毛孔, 猶孔雀項。 一毛旋生, 軟細紺青, 身放大光, 普照十方, 即於牛時, 滅盡三界, 無量國十, 一切諸苦, 令諸眾生, 悉受快樂, 地獄畜生, 諸人天等, 及以餓鬼, 安隱無患, 悉滅一切, 無量惡趣。 身色微妙, 如融金聚; 面貌清淨, 如月盛滿; 佛身明耀, 如日初出; 進止威儀, 脩臂下垂, 猶如師子; 立過干膝, 娑羅樹枝; 猶如風動, 圓光一尋, 能照無量, 猶如聚集, 百千日月; 無諸垢穢, 佛身淨妙, 其明普照, 佛光巍巍, 一切佛剎; 明焰熾盛, 悉能隱蔽, 無量日月; 佛日燈炬, 照無量界, 皆令眾生, 尋光見佛。 本所修習, 百千行業, 聚集功德, 莊嚴佛身, 臂傭纖圓, 如象王鼻; 手足淨軟, 敬愛無厭; 去來諸佛, 現在諸佛, 數如微塵, 亦復如是; 我今悉禮。 如是如來, 身口清淨, 意亦如是, 以妙香華, 供養奉獻,

百千功德, 設以百舌, 讚詠歌歎, 於千劫中, 不能得盡; 歎佛功德, 如來所有, 現世功德, 種種深固, 設復千舌, 欲讚一佛, 微妙第一, 功德少分, 尚不能盡, 況欲歎美, 諸佛功德? 大地及天, 以為大海, 乃至有頂, 滿其中水, 尚以一毛, 佛一功德。 知其滴數, 無有能知, 我今以禮, 讚歎諸佛, 身口意業, 一切所修, 悉皆清淨, 無量善業, 與諸眾生, 證無上道。』 如是人王, 復作如是, 無量誓願: 讚歎佛已, 『若我來世, 阿僧祇劫, 無量無邊, 常於夢中, 在在牛處, 見妙金鼓, 深奧之聲。 得聞懺悔, 今所讚歎, 願我來世, 亦得如是。 面貌清淨, 諸佛功德, 不可思議, 於百千劫, 甚難得值, 願於當來, 無量之世, 我當具足, 夜則夢見, 書如實說。 濟拔眾生, 越於苦海, 修行六度, 成無上道; 令我世界, 然後我身, 無與等者, 奉貢金鼓, 讚佛因緣, 當來之世, 以此果報, 值釋咖佛, 并令二子: 得受記前, 金龍金光, 同共受記。 若有眾生, 常牛我家, 無救護者, 眾苦逼切, 無所依止, 我於當來, 為是等輩, 作大救護, 能除眾苦, 及依止處, 悉令滅盡, 施與眾生, 諸善安樂。 我未來世, 行菩薩道, 不計劫數, 如盡本際, 以此金光, 懺悔因緣, 使我惡海, 及以業海、 煩惱大海, 悉竭無餘。 我功德海, 願悉成就; 智慧大海, 清淨具足; 無量功德, 助菩提道, 猶如大海, 珍寶具足。 以此金光, 懺悔力故, 菩提功德, 光明無礙, 慧光無垢, 照徽清淨。 我當來世, 身光普照, 功德威神, 光明焰盛,

最勝殊特, 於三界中, 諸功德力, 無所減少, 當度眾生, 越於苦海, 功德大海。 來世多劫, 并復安置, 如昔諸佛, 行菩提道, 行菩提者。 三世諸佛, 淨妙國十; 諸佛至尊, 無量功德; 令我來世, 得此殊異, 如佛世尊。』 功德淨土, 信相當知, 金龍尊者, 則汝身是; 爾時國王, 金龍金光, 爾時二子, 今汝二子, 銀相等是。」

金光明經空品第五

「無量餘經, 已廣說空, 是故此中, 略而解說。 眾生根鈍, 尠於智慧, 不能廣知, 無量空義, 故此尊經, 異妙方便, 種種因緣, 略而說之; 起大悲心, 為鈍根故, 今我演說, 此妙經典。 如我所解, 知眾生意, 六入村落, 是身虚偽, 猶如空聚; 結賊所止, 一切自住, 各不相知。 耳分別聲; 眼根受色; 鼻嗅諸香; 舌嗜於味; 所有身根, 貪受諸觸; 一切諸法; 意根分別, 六情諸根, 各各自緣, 諸塵境界, 不行他緣。 馳騁六情, 心如幻化, 而常妄想, 分別諸法; 猶如世人, 馳走空聚, 心常依止, 六賊所害, 愚不知避。 所伺之處, 六根境界, 各各自知, 隨行色聲、 香味觸法。 心處六情, 其心在在, 如鳥投網, 常處諸根, 隨逐諸塵, 無有暫捨。 身空虚偽, 不可長養, 無有諍訟, 亦無正主, 和合而有, 從諸因緣, 無有堅實, 妄想故起。 業力機關, 假為空聚, 地水火風, 隨時增減, 合集成立, 同處一筬, 共相殘害; 猶如四蛇,

```
四大蚖蛇,
       其性各異,
               二上二下,
       如是蛇大,
               悉滅無餘。
諸方亦二,
       其性沈下;
               風火二蛇,
地水二蛇,
性輕上升;
       心識二性,
               躁動不停,
       人天諸趣,
隨業受報,
               隨所作業,
而墮諸有。
       水火風種,
               散滅壞時,
大小不淨,
       盈流於外;
               體生諸蟲,
無可愛樂;
       捐棄塚間,
               如朽敗木。
善女當觀,
               何處有人,
       諸法如是,
及以眾生?
               無明故有,
       本性空寂,
如是諸大,
       一一不實,
               本自不生,
性無和合。
       以是因緣,
               我說諸大,
       和合而有;
從本不實,
               無明體相,
本自不有,
       妄想因緣,
               和合而有;
無所有故,
       假名無明,
               是故我說,
               六入觸受、
名曰無明、
       行識名色、
愛取有牛、
       老死愁惱,
               眾苦行業,
       生死無際,
不可思議,
               輪轉不息。
       亦無和合,
               不善思惟,
本無有生,
心行所浩。
       我斷一切,
               諸見纏等,
以智慧刀,
       裂煩惱網;
               五陰舍宅,
       證無上道,
               微妙功德;
觀悉空寂,
開甘露門、
       示甘露器、
               入甘露城、
       令諸眾生,
               食甘露味。
處甘露室,
       擊大法鼓,
吹大法螺、
               然大法炬、
雨勝法雨。
       我今摧伏,
               一切怨結,
               度諸眾生,
       微妙法幢;
竪立第一,
       永斷三惡,
               無量苦惱。
於牛死海,
               無有救護,
       燒諸眾生,
煩惱熾然,
       我以甘露,
無所依止;
               清涼美味,
充足是輩,
       令離焦熱,
               於無量劫,
       供養恭敬,
               諸佛世尊;
遵修諸行,
       菩提之道;
               求於如來,
堅固修習,
       捨諸所重,
               肢節手足、
真實法身;
頭目髓腦、
       所愛妻子、
               錢財珍寶、
       金銀琉璃,
               種種異物。」
直珠瓔珞、
```

金光明經卷第一

金光明經四天王品第六

爾時毘沙門天王、提頭賴吒天王、毘留勒叉天王、毘留博叉天王,俱從座起偏袒右肩,右膝著地胡跪合掌,白佛言:「世尊!是金光明微妙經典眾經之王,諸佛世尊之所護念,莊嚴菩薩深妙功德,常為諸天之所恭敬,能令天王心生歡喜,亦為護世之所讚歎。此經能照諸天宮殿,是經能與眾生快樂,是經能令地獄、餓鬼、畜生諸河焦乾枯竭,是經能除一切怖畏,是經能却他方怨賊,是經能除穀貴饑饉,是經能愈一切疫病,是經能滅惡星變異,是經能除一切憂惱。舉要言之,是經能滅一切眾生無量無邊百千苦惱。

「世尊!是金光明微妙經典,若在大眾廣宣說時,我等四王及餘眷屬,聞此甘露無上法味,增益身力心進勇銳具諸威德。

「世尊!我等四王,能說正法修行正法,為世法王以法治世。

「世尊!我等四王及天、龍、鬼神、乾闥婆、阿脩羅、迦樓羅、緊 那羅、摩睺羅伽,以法治世,遮諸惡鬼噉精氣者。

「世尊!我等四王二十八部諸鬼神等,及無量百千鬼神,以淨天眼過於人眼,常觀擁護此閻<mark>浮</mark>提。世尊!是故我等名護世王。若此國土有諸衰耗、怨賊侵境、饑饉疾疫種種艱難,若有比丘受持是經,我等四王當共勸請,令是比丘以我力故,疾往彼所國邑郡縣,廣宣流布是金光明微妙經典,令如是等種種百千衰耗之事悉皆滅盡。

「世尊!如諸國王所有土境,是持經者若至其國,是王應當往是人所,聽受如是微妙經典,聞已歡喜,復當護念恭敬是人。世尊!我 等四王,復當勤心擁護是王及國人民,為除衰患令得安隱。

「世尊!若有比丘、比丘尼、優婆塞、優婆夷受持是經,若諸人王 有能供給施其所安,我等四王,亦當令是王及國人民一切安隱具足 無患。世尊!若有四眾受持讀誦是妙經典,若諸人王有能供養恭敬 尊重讚歎;我等四王,亦復當令如是人王,於諸王中常得第一供養 恭敬尊重讚歎,亦令餘王欽尚羨慕稱讚其善。」

爾時世尊讚歎護世四天王等:「善哉,善哉!汝等四王,過去已曾供養恭敬尊重讚歎無量百千萬億諸佛,於諸佛所種諸善根,說於正法修行正法,以法治世為人天王。汝等今日長夜利益於諸眾生,行大悲心,施與眾生一切樂具,能遮諸惡勤與諸善。以是義故,若有人王能供養恭敬此金光明微妙經典,汝等正應如是護念,滅其苦惱與其安樂。

「汝等四王及諸眷屬、無量無邊百千鬼神,若能護念如是經者,即是護持去來現在諸佛正法。汝等四王及餘天眾百千鬼神,與阿脩羅共戰鬪時,汝等諸天常得勝利。汝等若能護念此經,悉能消伏一切諸苦,所謂怨賊饑饉疾疫。若四部眾有能受持讀誦此經,汝等亦應勤心守護,為除衰惱施與安樂。」

爾時四王復白佛言:「世尊!是金光明微妙經典,於未來世在所流 布,若國土城邑郡縣村落隨所至處,若諸國王以天律治世,復能恭 敬至心聽受是妙經典,并復尊重供養供給持是經典四部之眾,以是 因緣,我等時時得聞如是微妙經典,聞已即得增益身力,心進勇銳 具諸威德。是故我等及無量鬼神,常當隱形隨其妙典所流布處,而 作擁護令無留難;亦當護念聽是經典諸國王等及其人民,除其患難 悉令安隱,他方怨賊亦使退散。若有人王聽是經時,隣國怨敵興如 是念:『當具四兵壞彼國土。』世尊!以是經典威神力故,爾時隣 敵更有異怨為作留難,於其境界起諸衰惱災異疫病。爾時怨敵起如 是等諸惡事已,備具四兵,發向是國規往討罰。我等爾時,當與眷 屬無量無邊百千鬼神,隱蔽其形為作護助,令彼怨敵自然退散,起 諸怖懅種種留難。彼國兵眾尚不能到,況復當能有所破壞?」 爾時佛讚四天王等:「善哉,善哉!汝等四王,乃能擁護我百千億 那由他劫所可修習阿耨多羅三藐三菩提,及諸人王受持是經恭敬供 養者,為消衰患令其安樂;復能擁護宮殿舍宅城邑村落國土邊疆, 乃至怨賊悉令退散,滅其衰惱令得安隱,亦令一切閻浮提內所有諸 王無諸凶衰鬪訟之事。

「四王當知,此閻浮提八萬四千城邑聚落、八萬四千諸人王等,各 於其國娛樂快樂,各各於國而得自在;於自所有錢財珍寶,各各自 足不相侵奪;如其宿世所修集業隨業受報,不生惡心貪求他國;各 各自生利益之心,生於慈心、安樂之心、不諍訟心、不破壞心、無 繫縛心、無楚撻心,各於其土自生愛樂,上下和睦猶如水乳,心相 愛念增諸善根。以是因緣故,此閻浮提安隱豐樂,人民熾盛大地沃 壤,陰陽調和時不越序,日月星宿不失常度,風雨隨時無諸災橫, 人民豐實自足於財,心無貪吝亦無嫉妬,等行十善,其人壽終多生 天上,天宮充滿增益天眾。

「若未來世有諸人王聽是經典,及供養恭敬受持是經四部之眾,是 王則為安樂利益汝等四王及餘眷屬無量百千諸鬼神等。何以故?汝 等四王,若得時時聞是經典,則為已得正法之水,服甘露味增益身 力,心進勇銳具諸威德。是諸人王,若能至心聽受是經,則為已能 供養於我。若供養我,則是供養過去未來現在諸佛;若能供養過去 未來現在諸佛,則得無量不可思議功德之聚。以是因緣,是諸人王 應得擁護,及后妃婇女中宮眷屬諸王子等亦應得護,衰惱消滅快樂 熾盛,宮殿堂宇安隱清淨無諸災變,護宅之神增長威德,亦受無量 歡悅快樂。是諸國土所有人民,悉受種種五欲之樂,一切惡事悉皆 消滅。」

爾時四天王白佛言:「世尊!未來之世若有人王,欲得護身及后妃 婇女諸王子等宮殿屋宅,得第一護身所王領最為殊勝,具不可思議 王者功德;欲得攝取無量福聚,國土無有他方怨賊,無諸憂惱及諸 苦事。世尊!如是人王,不應放逸散亂其心,應生恭敬謙下之心, 應當莊嚴第一微妙最勝宮宅,種種香汁持用灑地,散種種華,敷大 法座師子之座,兼以無量珍琦異物而為校飾,張施種種無數微妙幢 幡寶蓋;當淨洗浴以香塗身,著好淨衣纓絡自嚴,坐卑小座不自高 大,除去自在離諸放逸,謙下自卑除去驕慢,正念聽受如是妙典, 於說法者生世尊想;復於宮內后妃王子婇女眷屬,生慈哀心和顏與 語,勸以種種供養之具供養法師。是王爾時既勸化已,即生無量歡 喜快樂,心懷悅豫倍復自勵,不生疲倦多作利益,於說法者倍生恭 敬。」

爾時佛告四天大王:「爾時人王,應著白淨鮮潔之衣,種種纓絡齊整莊嚴,執持素白微妙上蓋,服飾容儀不失常則,躬出奉迎說法之人。何以故?是王如是隨其舉足步步之中,即是供養值遇百千億那由他諸佛世尊;復得超越如是等劫生死之難;復於來世爾所劫中,常得封受轉輪王位;隨其步步亦得如是現世功德不可思議自在之力;常得最勝極妙七寶人天宮殿;在在生處增益壽命;言語辯了人所信用;無所畏忌有大名稱;常為人天之所恭敬,天上人中受上妙樂;得大勢力具足威德;身色微妙端嚴第一;常值諸佛遇善知識;成就具足無量福聚。

「汝等四天王!如是人王,見如是等種種無量功德利益,是故此王應當躬出奉迎法師;若一由旬至百千由旬,於說法師應生佛想,應作是念:『今日釋迦如來正智,入於我宮受我供養,為我說法,我聞是法,即不退轉於阿耨多羅三藐三菩提,已為得值百千萬億那由他佛,已為供養過去未來現在諸佛,已得畢竟三惡道苦。我今已種百千無量轉輪聖王釋梵之因,已種無邊善根種子,已令無量百千萬億諸眾生等度於生死,已集無量無邊福聚,後宮眷屬已得擁護,宮宅諸衰悉已消滅,國土無有怨賊棘刺,他方怨敵不能侵陵。』

「汝等四王!如是人王,應作如是供養正法,清淨聽受是妙經典, 及恭敬供養尊重讚歎持是經典四部之眾;亦當迴此所得最勝功德之 分,施與汝等及餘眷屬諸天鬼神。聚集如是諸善功德,現世常得無 量無邊不可思議自在之利,威德勢力成就具足,能以正法摧伏諸 惡。」 爾時四王白佛言:「世尊!若未來世有諸人王,作如是等恭敬正法,至心聽受是妙經典,及恭敬供養尊重讚歎持是經典四部之眾,嚴治舍宅香汁灑地,專心正念聽說法時,我等四王亦當在中共聽此法,願諸人王為自利故,以己所得功德少分施與我等。

「世尊!是諸人王於說法者所坐之處,為我等故燒種種香供養是經,是妙香氣,於一念頃即至我等諸天宮殿,其香即時變成香蓋,其香微妙金色晃耀照我等宮釋宮梵宮。大辯天神、功德天神、堅牢地神、散脂鬼神、最大將軍、二十八部鬼神大將、摩醯首羅、金剛密迹、摩尼跋陀鬼神大將、鬼子母,與五百兒子周匝圍繞,阿耨達龍王、娑竭羅龍王,如是等眾,自於宮殿各各得聞是妙香氣,及見香蓋光明普照,是香蓋光明亦照一切諸天宮殿。」

佛告四王:「是香蓋光明非但至汝四王宮殿。何以故?是諸人王手擎香爐,供養經時,其香遍布,於一念頃遍至三千大千世界,百億日月、百億大海、百億須彌山、百億大鐵圍山小鐵圍山及諸山王;百億四天下、百億四天王、百億三十三天,乃至百億非想非非想天。於此三千大千世界、百億三十三天,一切龍、鬼、乾闥婆、阿脩羅、迦樓羅、緊那羅、摩睺羅伽,宮殿虛空悉滿種種香煙雲蓋,其蓋金光亦照宮殿。如是三千大千世界,所有種種香煙雲蓋,皆是此經威神力故。

「是諸人王手擎香爐供養經時、種種香氣,不但遍此三千大千世界,於一念頃亦遍十方無量無邊恒河沙等百千萬億諸佛世界,於諸佛上虛空之中,亦成香蓋,金光普照,亦復如是。諸佛世尊聞是妙香,見是香蓋及金色光,於十方界恒河沙等諸佛世界,作如是等神力變化已,異口同音於說法者稱讚:『善哉,善哉!大士!汝能廣宣流布如是甚深微妙經典,則為成就無量無邊不可思議功德之聚,若有聞是甚深經典,所得功德則為不少,況持讀誦為他眾生開示分別演說其義。何以故?善男子!此金光明微妙經典,無量無邊億那由他諸菩薩等,若得聞者,即不退於阿耨多羅三藐三菩提。』

「爾時十方無量無邊恒河沙等,諸佛世界現在諸佛,異口同聲作如 是言:『善男子!汝於來世必定當得坐於道場菩提樹下,於三界中 最尊最勝,出過一切眾生之上,勤修力故受諸苦行,善能莊嚴菩提 道場,能壞三千大千世界外道邪論,摧伏諸魔怨賊異形,覺了諸法 第一寂滅清淨無垢甚深無上菩提之道。

「『善男子!汝已能坐金剛座處,轉於無上諸佛所讚十二種行甚深 法輪,能擊無上最大法鼓,能吹無上極妙法螺,能竪無上最勝法 幢,能然無上極明法炬,能兩無上甘露法兩,能斷無量煩惱怨結, 能令無量百千萬億那由他眾,度於無涯可畏大海,解脫生死無際輪 轉,值遇無量百千萬億那由他佛。』」 爾時四天王復白佛言:「世尊!是金光明微妙經典,能得未來現在種種無量功德,是故人王,若得聞是微妙經典,則為已於百千萬億無量佛所種諸善根。我以敬念是人王故,復見無量福德利故,我等四王及餘眷屬無量百千萬億鬼神,於自宮殿見是種種香煙雲蓋瑞應之時,我當隱蔽不現其身,為聽法故,當至是王所至宮殿講法之處。大梵天王、釋提桓因、大辯天神、功德天神、堅牢地神、散脂鬼神、大將軍等,二十八部鬼神大將、摩醯首羅、金剛密迹、摩尼跋陀鬼神大將、鬼子母及五百兒子,周匝圍繞,阿耨達龍王、娑竭羅龍王,無量百千萬億那由他鬼神諸天,如是等眾為聽法故,悉自隱蔽不現其身,至是人王所止宮殿講法之處。

「世尊!我等四王及餘眷屬無量鬼神,悉當同心以是人王為善知識,同共一行善相應行,能為無上大法施主,以甘露味充足我等;我等應當擁護是王,除其衰患令得安隱,及其宮宅國土城邑,諸惡災患悉今消滅。

「世尊!若有人王,於此經典心生捨離不樂聽聞,其心不欲恭敬供養尊重讚歎;若四部眾有受持讀誦講說之者,亦復不能恭敬供養尊重讚歎。我等四王及餘眷屬無量鬼神,即便不得聞此正法,背甘露味失大法利,無有勢力及以威德,減損天眾增長惡趣。世尊!我等四王及無量鬼神捨其國土,不但我等,亦有無量守護國土諸舊善神皆悉捨去。我等諸王及諸鬼神既捨離已,其國當有種種災異,一切人民失其善心,唯有繫縛瞋恚鬪諍,互相破壞多諸疾疫,彗星現怪流星崩落,五星諸宿違失常度,兩日並現日月薄蝕,白黑惡虹數數出現,大地震動發大音聲,暴風惡兩無日不有,穀米勇貴饑饉凍餓,多有他方怨賊侵掠其國,人民多受苦惱,其地無有可愛樂處。世尊!我等四王及諸無量百千鬼神,并守國土諸舊善神,遠離去時生如是等無量惡事。

「世尊!若有人王,欲得自護及王國土多受安樂,欲令國土一切眾生悉皆成就具足快樂,欲得摧伏一切外敵,欲得擁護一切國土,欲以正法正治國土,欲得除滅眾生怖畏。世尊!是人王等,應當必定聽是經典,及恭敬供養讀誦受持是經典者。我等四王及無量鬼神,以是法食善根因緣,得服甘露無上法味,增長身力心進勇銳增益諸天。何以故?以是人王至心聽受是經典故,如諸梵天說出欲論、釋提桓因種種善論、五通之人神仙之論。

「世尊!梵天釋提桓因五神通人,雖有百千億那由他無量勝論,是 金光明於中最勝。所以者何?如來說是《金光明經》,為眾生故, 為令一切閻浮提內諸人王等以正法治,為與一切眾生安樂,為欲愛 護一切眾生,欲令眾生無諸苦惱,無有他方怨賊棘刺,所有諸惡背 而不向,欲令國土無有憂惱,以正法教無有諍訟,是故人王各於國 土,應然法炬熾然正法增益天眾。我等四王及無量鬼神、閻浮提內諸天善神,以是因緣,得服甘露法味充足,得大威德進力具足,閻浮提內安隱豐樂,人民熾盛安樂其處;復於來世無量百千不可思議那由他劫,常受微妙第一快樂,復得值遇無量諸佛種諸善根,然後證成阿耨多羅三藐三菩提。得如是等無量功德,悉是如來正遍知說,如來過於百千億那由他諸梵天等,以大悲力故,亦過無量百千億那由他釋提桓因,以苦行力故。是故如來為諸眾生,演說如是《金光明經》。若閻浮提一切眾生及諸人王,世間出世間所作國事,所造世論皆因此經。欲令眾生得安樂故,釋迦如來示現是經廣宣流布。世尊!以是因緣故,是諸人王,應當必定聽受供養恭敬尊重讚歎是經。」

爾時佛復告四天王:「汝等四王及餘眷屬無量百千那由他鬼神!是諸人王,若能至心聽是經典,供養恭敬尊重讚歎。汝等四王,正應擁護,滅其衰患而與安樂。若有人能廣宣流布如是妙典,於人天中大作佛事,能大利益無量眾生,如是之人,汝等四王,必當擁護莫令他緣而得擾亂,令心恬靜受於快樂,續復當得廣宣是經。」爾時四天王,即從座起偏袒右肩,右膝著地長跪合掌,於世尊前以偈讚曰:

滿足莊嚴, 佛曰暉曜, 「佛月清淨, 放千光明。 如來面目, 最上明淨, 齒白無垢, 如蓮華根; 功德無量, 智淵無邊, 猶如大海; 法水具足; 無有缺減; 足下平滿, 百千三昧, 千輻相現; 足指網縵, 猶如鵝干; 光明晃耀, 如簪山王; 微妙清淨, 如鍊真金; 所有福德, 不可思議; 我今敬禮。 佛功德山, 佛直法身, 猶如虚空, 應物現形, 如水中月, 如焰如仆, 是故我今, 無有障礙, 稽首佛月。」

爾時世尊,以偈答曰:

「此金光明, 諸經之王, 甚深最勝, 為無有上; 十力世尊, 之所宣說, 汝等四王, 應當勤護。 以是因緣, 是深妙典, 能與眾生, 無量快樂,

安樂利益, 故久流布, 為諸眾生, 於閻浮提; 大千世界, 能滅三千, 閻浮提內, 所有惡趣, 無量諸苦。 諸人王等, 心生慈愍, 正法治世, 則令其十, 若能流布, 此妙經典, 安隱豐熟, 所有眾生, 悉受快樂。 若有人王, 欲愛己身, 及其國十, 應當至心, 淨潔洗浴, 欲令豐盛, 聽受是經。 是經能作, 往法會所, 摧伏一切, 所有善事, 內外怨賊; 復能除滅, 無量怖畏; 是諸經王, 能與一切, 無量眾生, 安隱快樂。 在人家中, 譬如寶樹, 悉能出生, 亦復如是, 一切珍寶; 是妙經典, 悉能出生, 諸王功德。 如清冷水, 是妙經典, 亦復如是, 能除渴乏; 能除諸王, 功德渴乏。 譬如珍寶、 異物簇器, 悉在干手, 隨意所用; 是金光明, 亦復如是, 隨意能與, 諸干法寶。 是金光明, 微妙經典, 常為諸天, 恭敬供養; 亦為護世, 威神勢力, 四大天王, 之所護持; 十方諸佛, 常念是經, 若有演說, 稱讚善哉。 無量鬼神, 亦有百千, 從十方來, 擁護是人; 若有得聞, 是妙經典, 心牛歡喜, 踊躍無量。 閻浮提內, 無量大眾, 皆悉歡喜, 集聽是經; 聽是經故, 具諸威德, 增益天眾, 精氣身力。」

爾時四天王聞是偈已,白佛言:「世尊!我從昔來未曾得聞如是微妙寂滅之法,我聞是已心生悲喜涕淚交流,舉身戰動肢節怡解,復得無量不可思議具足妙樂。」以天曼陀羅華、摩訶曼陀羅華,供養奉散於如來上。作如是等供養佛已,復白佛言:「世尊!我等四王,各各自有五百鬼神,常當隨逐是說法者而為守護。」

金光明經大辯天神品第七

爾時大辯天白佛言:「世尊!是說法者,我當益其樂說辯才,令其所說莊嚴次第善得大智,若是經中有失文字句義違錯,我能令是說法比丘次第還得,能與總持令不忘失。若有眾生於百千佛所種諸善根,是說法者為是等故,於閻浮提廣宣流布是妙經典令不斷絕,復令無量無邊眾生得聞是經,當令是等悉得猛利不可思議大智慧聚、不可稱量福德之報,善解無量種種方便、善能辯暢一切諸論、善知世間種種技術,能出生死得不退轉,必定疾得阿耨多羅三藐三菩提。」

金光明經功德天品第八

爾時功德天白佛言:「世尊!是說法者,我當隨其所須之物,衣服飲食臥具醫藥及餘資產,供給是人無所乏少,令心安住晝夜歡樂,正念思惟是經章句分別深義。若有眾生於百千佛所種諸善根,是說法者為是等故,於閻浮提廣宣流布是妙經典令不斷絕,是諸眾生聽是經已,於未來世無量百千那由他劫,常在天上人中受樂,值遇諸佛,速成阿耨多羅三藐三菩提,三惡道苦悉畢無餘。

「世尊!我已於過去寶華功德海琉璃金山照明如來、應供、正遍知、明行足、善逝、世間解、無上士、調御丈夫、天人師、佛、世尊所種諸善根,是故我今隨所念方、隨所視方、隨所至方,能令無量百千眾生受諸快樂,若衣服飲食資生之具、金銀七寶、真珠琉璃、珊瑚琥珀、壁玉珂貝,悉無所乏。若有人能稱金光明微妙經典,為我供養諸佛世尊,三稱我名燒香供養;供養佛已,別以香華種種美味,供施於我灑散諸方,當知是人即能聚集資財寶物。以是因緣增長地味,地神諸天悉皆歡喜,所種穀米牙莖枝葉果實滋茂,樹神歡喜出生無量種種諸物。我時慈念諸眾生故,多與資生所須之物。

「世尊!於此北方,毘沙門天王有城名曰阿尼曼陀,其城有園名功德華光,於是園中有最勝園,名曰金幢七寶極妙,此即是我常止住處。若有欲得財寶增長,是人當於自所住處,應淨掃灑洗浴其身,著鮮白衣妙香塗身,為我至心三稱彼佛寶華琉璃世尊名號,禮拜供養燒香散華;亦當三稱金光明經至誠發願,別以香華種種美味,供施於我散灑諸方,爾時當說如是章句:

「波利富樓那遮利 三曼陀達舍尼羅佉 摩訶毘呵羅伽帝 三曼陀 毘陀那伽帝 摩訶迦梨波帝 波婆禰 薩婆哆呢 三曼陀 脩鉢梨 富隷 阿夜那達摩帝 摩訶毘鼓畢帝 摩訶彌勒簸僧祇帝 醢帝簁 三博祇悕帝 三曼陀阿咃 阿翁婆羅尼 「是灌頂章句,必定吉祥真實不虛。等行眾生及中善根,應當受持 讀誦通利,七日七夜受持八戒,朝暮淨心,香華供養十方諸佛,常 為己身及諸眾生,迴向具足阿耨多羅三藐三菩提,作是誓願:『令 我所求皆得吉祥。』自於所居房舍屋宅淨潔掃除。若自住處、若阿 蘭若處,以香泥塗地、燒微妙香、敷淨好座,以種種華香布散其地 以待於我;我於爾時如一念頃,入其室宅即坐其座,從此日夜令此 所居,若村邑、若僧坊、若露地,無所乏少,若錢若金銀若珍寶、 若牛羊若穀米,一切所須即得具足悉受快樂。若能以己所作善根最 勝之分迴與我者,我當終身不遠其人,於所住處至心護念,隨其所 求令得成就。

「應當至心禮如是等諸佛世尊,其名曰:寶勝如來、無垢熾寶光明 王相如來、金焰光明如來、金百光明照藏如來、金山寶蓋如來、金 華焰光相如來、大炬如來、寶相如來;亦應敬禮:信相菩薩、金光 明菩薩、金藏菩薩、常悲菩薩、法上菩薩;亦應敬禮:東方阿閦如 來、南方寶相如來、西方無量壽佛、北方微妙聲佛。」

金光明經堅牢地神品第九

爾時地神堅牢白佛言:「世尊!是金光明微妙經典,若現在世若未來世,在在處處——若城邑聚落,若山澤空處,若王宮宅。世尊!隨是經典所流布處,是地分中敷師子座,令說法者坐其座上,廣演宣說是妙經典;我當在中常作宿衛,隱蔽其身於法座下頂戴其足。我聞法已,得服甘露無上法味增益身力,而此大地深十六萬八千由旬,從金剛際至海地上,悉得眾味增長具足,豐壤肥濃過於今日。以是之故,閻浮提內藥草樹木、根莖枝葉華果滋茂,美色香味皆悉具足。眾生食已,增長壽命色力辯安,六情諸根具足通利,威德顏貌端嚴殊特;成就如是種種等已,所作事業多得成辦,有大勢力精勤勇猛。

「是故,世尊!閻浮提內安隱豐樂人民熾盛,一切眾生多受快樂,應心適意隨其所樂。是諸眾生得是威德大勢力已,能供養是《金光明經》,及恭敬供養持是經者四部之眾。我於爾時當往其所,為諸眾生受快樂故,請說法者廣令宣布如是妙典。何以故?世尊!是金光明若廣說時,我及眷屬所得功德倍過於常,增長身力心進勇銳。「世尊!我服甘露無上味已,閻浮提地縱廣七千由旬豐壤倍常。世尊!如是大地眾生所依,悉能增長一切所須之物,增長一切所須物已,令諸眾生隨意所用受於快樂——種種飲食衣服臥具、宮殿屋宅樹木林苑、河池井泉,如是等物依因於地悉皆具足。是故,世尊!是諸眾生為知我恩,應作是念:『我當必定聽受是經,供養恭敬尊

重讚歎。』作是念已,即從住處,若城邑聚落舍宅空地,往法會所聽受是經。既聽受已還其所止,各應相慶作如是言:『我等今者聞此甚深無上妙法,已為攝取不可思議功德之聚,值遇無量無邊諸佛,三惡道報已得解脫,於未來世常生天上人中受樂。』是諸眾生各於住處,若為他人演說是經,若說一喻一品一緣,若復稱歎一佛一菩薩一四句偈乃至一句,及稱是經首題名字。世尊!隨是眾生所住之處,其地具足豐壤肥濃過於餘地,凡是因地所生之物,悉得增長滋茂廣大,令諸眾生受於快樂,多饒財寶好行惠施,心常堅固深信三寶。」

爾時佛告地神堅牢:「若有眾生,乃至聞是《金光明經》一句之義,人中命終隨意往生三十三天。地神!若有眾生,為欲供養是經典故莊嚴屋宅,乃至張懸一幡一蓋及以一衣,欲界六天已有自然七寶宮殿,是人命終即往生彼。地神!於諸七寶宮殿之中,各各自然有七天女共相娛樂,日夜常受不可思議微妙快樂。」

爾時地神白佛言:「世尊!以是因緣,說法比丘坐法座時,我常畫夜衛護不離,隱蔽其形在法座下頂戴其足。世尊!若有眾生於百千佛所種諸善根,是說法者為是等故,於閻浮提廣宣流布是妙經典令不斷絕。是諸眾生聽是經已,未來之世無量百千那由他劫,於天上人中常受快樂,值遇諸佛,疾成阿耨多羅三藐三菩提,三惡道苦悉斷無餘。」

金光明經卷第二

金光明經散脂鬼神品第十

爾時散脂鬼神大將,及二十八部諸鬼神等,即從座起,偏袒右肩右膝著地,白佛言:「世尊!是金光明微妙經典,若現在世及未來世,在在處處,若城邑聚落、若山澤空處、若王宮宅,隨是經典所流布處,我當與此二十八部大鬼神等,往至彼所隱蔽其形,隨逐擁護是說法者,消滅諸惡令得安隱;及聽法眾,若男若女童男童女,於是經中乃至得聞一如來名、一菩薩名及此經典首題名字,受持讀誦,我當隨侍宿衛擁護,悉滅其惡令得安隱,及國邑城郭,若王宮殿、舍宅空處,皆亦如是。世尊!何因緣故,我名散脂鬼神大將?唯然世尊,自當證知。

「世尊!我知一切法一切緣法,了一切法,知法分齊,如法安住一切法如性,於一切法含受一切法。世尊!我現見不可思議智光、不可思議智矩、不可思議智行、不可思議智聚、不可思議智境。世尊!我於諸法正解正觀,得正分別,正解於緣,正能覺了。世尊!以是義故,名散脂大將。

「世尊!我散脂大將,令說法者莊嚴言辭辯不斷絕,眾味精氣從毛孔入,充益身力心進勇銳,成就不可思議智慧入正憶念,如是等事悉令具足心無疲厭,身受諸樂心得歡喜,以是意故,能為眾生廣說是經。

「若有眾生,於百千佛所種諸善根,說法之人,為是眾生於閻浮提內,廣宣流布是妙經典令不斷絕;無量眾生聞是經已,當得不可思議智聚,攝取不可思議功德之聚,於未來世無量百千劫,人天之中常受快樂,於未來世值遇諸佛,疾得證成阿耨多羅三藐三菩提。一切眾苦、三惡趣分永滅無餘。

「南無寶華功德海琉璃金山光照如來、應供、正遍知。南無無量百千億那由他莊嚴其身釋迦如來、應供、正遍知,熾然如是微妙法 炬。南無第一威德成就眾事大功德天。南無不可思量智慧功德成就 大辯天。」

金光明經正論品第十一

爾時佛告地神堅牢:「過去有王名力尊相,其王有子名曰信相,不久當受灌頂之位統領國土。爾時父王告其大子信相:『世有正論,

善治國土。我於昔時曾為大子,不久亦當紹父王位。爾時父王持是 正論,亦為我說,我以是論於二萬歲善治國土,未曾一念以非法 行,於自眷屬情無愛著。』何等名為治世正論? 「地神!爾時力尊相王為信相大子,說是偈言: 「『我今當說, 諸王下論, 為利眾生, 斷諸疑惑。 一切人王、 諸天天王, 合掌諦聽。 諸王和合, 應當歡喜, 集金剛山, 護世四鎮, 起間梵王: 「大師梵尊, 天中自在, 能除疑惑, 當為我斷。 云何是人, 得名為天? 復名天子? 生在人中, 云何人王, 而名為天?」 正法治世, 處王宮殿, 問是事已, 時梵尊師, 護世四王, 「汝今雖以, 此義問我, 即說傷言: 一切眾生, 我要當為, 敷揚官暢, 第一勝論。 因集業故, 生於人中, 干領國十, 故稱人王。 處在胎中, 諸天守護, 或先守護, 然後入胎; 雖在人中, 生為人王, 以天護故, 復稱天子。 三十三天, 各以已德, 分與是人, 神力所加, 故稱天子。 故得自在; 猿離惡法, 摭今不起; 能 今 眾 生 , 安住善法, 修令增廣; 半名人王, 亦名執樂, 多牛天上。 能遮諸惡; 亦名父母, 羅剎魁膾, 教誨修善。 示現果報, 諸天所護; 善惡諸業, 現在未來, 現受果報, 若有惡事, 諸天所護; 縱而不問, 不治其罪, 不以下教, 捨猿善法, 故使國中, 增長惡趣, 多諸姦鬪, 各牛瞋恨, 三十三天, 由其國王, 縱惡不治。 壞國正法, 姦詐熾盛; 他方怨敵, 競來侵掠; 自家所有, 錢財珍寶, 諸惡盜賊, 共來劫奪。 若行是者, 不行是事; 如法治世, 踏蓮花池, 其國殄滅。 譬如犴象, 暴風卒起, 屢降惡雨, 惡星數出, 日月無光, 万穀果實, 咸不滋茂;

```
由王捨正,
       使國饑饉,
               天於宮殿,
悉懷愁惱,
               不修善事。」
       由王暴虐,
是諸天王,
       各相謂言:
               「是王行惡,
       以造惡故,
與惡為伴。
               速得天瞋;
以天瞋故,
       不久國敗,
               非法兵仗、
姦詐鬪訟、
       疾疫惡病,
               集其國土。」
       捨離是王,
諸天即便,
               今其國敗,
       兄弟姊妹、
生大愁惱。
               眷屬妻子,
               流星數墮、
孤拼流離,
       身亦滅亡;
二日並現;
       他方惡賊,
               侵掠其十;
人民飢餓,
       多諸疾疫;
               所重大臣,
捨離薨亡;
       象馬車乘,
               一念喪滅;
       國土所有,
               互相劫奪,
諸家財產,
刀兵而死;
       五星諸宿,
               違失常度;
       流遍其國;
               諸受寵祿,
諸惡疾疫,
       及諸群僚,
所任大臣,
               專行非法,
       偏受恩遇,
如是行惡,
               修善法者,
       於行惡者,
               而生恭敬,
日日衰滅;
見修善者,
       心不顧錄。
               故使世間,
三異並起,
       星宿失度,
               降暴風雨,
               眾生等類,
破壞甘露、
       無上正法、
               毀諸善人,
及以地肥;
       恭敬弊惡,
               穀米果實,
故天降雹、
       飢餓疫病;
       多病眾生,
               充滿其國;
滋味衰減;
       日日損減;
甘美盛果,
               苦澁惡味,
隨時增長。
               可愛之處,
       本所游戲,
悉皆枯悴,
       無可樂者;
               眾生所食,
       漸漸損減;
               食無肥膚,
精妙上味,
顏貌醜陋,
       氣力衰微;
               凡所食噉,
             悉滅無有;
不知厭足;
       力精勇猛
嬾惰懈怠,
       充滿其國;
               多有病苦,
       惡星變動,
逼切其身;
               羅剎亂行。
若有人王,
       行於非法,
               增長惡伴,
       於三有中,
損人天道,
               多受苦惱,
起如是等,
       無量惡事,
               皆由人王,
       縱之造惡,
愛著眷屬,
               捨而不治。
若為諸天,
       所護生者,
               如是人王,
終不為是。
       有行善者,
               得牛天中;
```

行不善者, 三十三天, 墮在三塗; 捨而不治, 皆牛焦熱。 由王縱惡, 違逆諸天, 及父母勅, 不能正治, 則非孝子; 起諸姦惡, 壞國土者, 不應縱捨, 是故諸天, 當正治罪。 護持是王, 以滅惡法, 修習善故, 應各為說, 得增王位, 現世正治, 故得為王。 善不善業, 能示因果, 為自為他, 諸天護持, 隣王佐助, 應當下教, 修正治國; 有壞國者, 不應行惡, 為命及國, 修行正法, 惡不應縱, 所有餘事, 不能壞國。 然後傾敗, 若起多姦, 要因多姦, 壞於國土。 譬如大象, 壞蓮華池; 故天生惱, 怨恨諸天, 起諸惡事, 彌滿其國。 是故應隨, 正法治世, 以善化國, 不順非法; 寧捨身命, 於親非親, 心常平等: 不愛眷屬, 視親非親, 和合為一。 正行名稱, 流布三界, 正法治國, 人多行善; 仰瞻國王, 能令天眾, 常以善心, 是故正治, 名為人王。 具足充满; 一切諸天, 愛護人王, 猶如父母, 擁護其子; 故令日月, 五星諸宿, 不失常度; 風雨隨時, 隨其分齊, 令國豐實, 無諸災禍, 安樂熾盛, 諸天之眾。 以是因緣, 增益人民, 寧捨身命, 不應為惡, 諸人王等, 不應捨離, 正法珍寶。 由正法寶, 世人受樂, 常當親近, 修正法者, 聚集功德, 莊嚴其身; 於自眷屬, 常知止足; 當遠惡人, 修治正法; 安止眾生, 於諸善法, 教勅防護, 安隱豐樂, **今離不善。** 是故國十, 威德具足。 隨諸人民, 是王亦得, 所行惡法, 應當調伏, 如法教詔, 善能攝護, 是王當得, 好名善譽, 安樂眾生。』」

金光明經善集品第十二

爾時如來復為地神,說往昔因緣,而作偈言: 「我昔曾為, 轉輪聖王, 捨四大地, 及以大海; 又於是時, 以四天下, 奉上諸佛。 滿中珍寶, 凡所布施, 不見可愛, 皆捨所重, 而不捨者。 於禍去世, 無數劫中, 求正法故, 常捨身命。 又過去世, 不可議劫, 有佛世尊, 名曰寶勝。 其佛世尊, 名曰善集, 般涅槃後, 時有聖王, 於四天下, 而得白在, 治正之勢, 名水音尊, 盡大海際。 其王有城, 止住治化。 夜睡夢中, 於其城中, 聞佛功德, 及見比丘, 名曰寶冥, 如來正法, 善能官暢, 所謂金光, 悉能遍照。 微妙經典, 明如日中, 是轉輪王, 夢是事已, 即尋覺寤, 即出宮殿, 至僧坊所, 心喜遍身, 諸大聖眾, 供養恭敬, 問諸大德: 『是大眾中, 頗有比丘, 名曰寶冥, 諸功德不?』 成就一切, 爾時寶冥, 思惟正念, 安坐不動, 在一窟中, 金光明經。 讀誦如是, 時有比丘, 即將是王, 至其所止, 到寶冥所。 故在窟中, 時此寶冥, 形貌殊特, 『是窟中者, 即示王言: 威德熾然。 寶冥比丘。 即是所問, 能持甚深, 諸佛所行, 名金光明, 諸經之王。』 即尋禮敬, 寶冥比丘, 時善集王, 『面如滿月, 作如是言: 威德熾然, 惟願為我, 敷演官說, 是金光明, 時寶冥尊, 即受王請, 諸經之王。』 許為宣說, 是金光明。 三千大千, 知當說法, 悉牛歡喜, 世界諸天, 於淨微妙, 鮮絜之處, 種種珍寶, 上妙香水, 廁填其地, 持用灑之; 散諸好華, 遍滿其處。 王於是時,

```
懸繒幡蓋,
自敷法座,
               寶飾交絡,
               悉以奉散,
種種微妙,
       殊特末香,
       一切諸天、
               龍及鬼神、
大法高座。
       緊那羅等,
               即雨天上,
摩睺羅伽、
               滿其處所;
曼陀羅華,
       遍散法座,
       百千萬億,
不可思議,
               那由他等,
無量諸天,
       一時俱來,
               集說法所。
               諸天即時,
是時寶冥,
       尋從窟出,
               寶冥比丘。
以娑羅華,
       供養奉散,
       淨洗身體,
是時寶冥,
               著淨妙衣,
至法座所,
       合掌敬禮,
               是法高座;
       及諸天人,
一切天王,
               雨曼陀羅、
大曼陀羅、
       摩訶曼殊、
               眾妙寶華,
無量百千,
       種種妓樂,
               於虚空中,
       寶冥比丘,
不鼓自鳴。
               能說法者,
尋上高座,
       結跏趺坐,
               即念十方,
不可思議,
               諸佛世尊,
       無量千億,
於諸眾生,
       興大悲心;
               及善集王,
所得王領,
       盡一日月,
               所照之處。
時說法者,
               敷揚官說,
       即尋為王,
是妙經典。
       是時大王,
               為聞法故,
於比丘前,
       合掌而立,
               聞於正法,
               涕淚交流;
讚言善哉,
       其心悲悼,
尋復踊悅,
               為欲供養,
       心意熙怡,
此經典故,
       爾時即提,
               如意珠王,
為諸眾生,
       發大誓願:
               『願於今日,
此閻浮提,
       悉雨無量,
               種種珍異,
       及妙瓔珞,
瑰琦七寶,
               以是因緣,
               皆受快樂。』
悉令無量,
       一切眾生,
即於爾時,
       尋雨七寶,
               及諸寶飾,
天冠耳璫、
       種種瓔珞、
               甘饌寶座,
       遍四天下。
悉皆充满,
               時王善集,
即持如是,
       滿四天下,
               無量七寶,
於寶勝佛,
       遺法之中,
               以用布施,
       爾時為王,
               說法比丘,
供養三寶。
於今現在,
       阿閦佛是;
               時善集王,
聽受法者,
       今則我身,
               釋迦文是。
我於爾時,
       捨此大地,
               滿四天下,
```

得聞如是, 金光明經; 珍寶布施, 聞是經已, 一稱善哉, 以此善根, 業因緣故, 身得金色, 百福莊嚴, 常為無量, 百千萬億, 眾生等類, 之所樂見; 既得見已, 無有厭足。 過去九十, 力億千劫, 常得作於, 轉輪聖王; 亦於無量, 百千劫中, 諸小國十; 不可思議, 常得王領, 劫中常作, 釋提相因, 及淨梵王; 十力世尊, 復得值遇, 其數無量, 不可稱計; 所得功德, 無量無邊, 皆由閩經, 及稱善哉。 如我所願, 正法之身, 我今已得。」 成就菩提,

金光明經鬼神品第十三

佛告功德天:「若有善男子、善女人,欲以不可思議妙供養具供養過去未來現在諸佛世尊,及欲得知三世諸佛甚深行處,是人應當必定至心,隨有是經流布之處,若城邑村落舍宅空處,正念不亂,至心聽是微妙經典。」

爾時世尊欲重宣此義,而說偈言:

「若欲供養, 一切諸佛, 欲知三世, 城邑聚落, 諸佛行處, 應當往彼, 有是經處, 至心聽受, 是妙經典。 不可思議, 功德大海, 無量無邊; 能令一切, 眾牛解脫, 度無量苦, 諸有大海。 是經甚深, 初中後善, 假使恒沙、 不可得說, 譬喻為比; 大地微塵、 大海諸水、 一切諸山, 如是等物, 若入是經, 不得為喻。 即入法性, 如深法性, 安住其中, 金光明中, 即於是典, 而得見我, 釋迦牟尼。 不可思議, 阿僧祇劫, 生天人中, 常受快樂, 以能信解, 不可思議, 聽是經故。 如是無量, 悉已得之。 功德福聚, 隨所至處, 若百由旬, 滿中盛火, 應從中過; 若至聚落, 阿蘭若處, 到法會所,

```
至心聽受,
       聽是經故,
               惡夢蠱道、
五星諸宿、
       變異災禍,
               一切惡事,
       於說法處、
               蓮華座上,
消滅無餘。
說是經典,
       書寫讀誦,
               是說法者,
       爾時大眾,
               猫見坐處,
若下法座,
故有說者,
       或佛世尊,
               或見佛像、
菩薩色像、
       普賢菩薩、
               文殊師利、
       及諸形像;
               見如是等,
彌勒大十,
       尋復滅盡,
               如前無異。
種種事已,
       諸功德已,
               而為諸佛,
成就如是,
       威德相貌,
之所讚歎;
               無量無邊;
       能却怨家;
有大名稱,
               他方盜賊,
能令退散;
       勇捍多力,
               能破強敵;
惡夢惱心,
       無量惡業,
               如是惡事,
皆悉寂滅。
       若入軍陣,
               常能勝他;
名聞流布,
       遍閻浮提;
               亦能摧伏,
               修習諸善;
       遠離諸惡,
一切怨敵;
入陣得勝,
       心常歡喜。
               大梵天王、
三十三天、
       護世四王、
               金剛密迹、
鬼神諸王、
       散脂大將、
               禪那英鬼,
及緊那羅、
       阿耨達龍、
               娑竭羅王、
       迦樓羅王,
               大辯天神、
阿脩羅王、
               諸天神等,
及功德天,
       如是上首,
常當供養,
       是聽法者,
               生不思議,
       眾生見者,
法塔之想;
               恭敬歡喜,
諸天王等,
       亦各思惟,
               而相謂言:
『令是眾生,
        無量威德,
                皆悉成就。』
若能來至,
       是法會所,
               如是之人,
       若有聽是,
               甚深經典,
成上善根;
       法會之處,
故嚴出往,
               心生不可,
思議正信,
       供養恭敬,
               無上法塔;
如是大悲,
       利益眾生,
               即是無量,
       能入甚深,
深法寶器,
               無上法性。
       聽是經典,
               如是之人,
由以淨心,
               百千諸佛;
悉已供養,
       過去無量,
以是善根,
               應當聽受,
       無量因緣,
       如是眾生,
是金光明。
               常為無量,
諸天神王,
       之所愛護,
               大辯功德、
```

護世四王、 無量鬼神, 及諸力士, 擁護四方, 令無災禍, 書夜精進, 永離諸苦。 釋提相因, 及日月天、 風水諸神、 違馱天神, 閻摩羅王、 及自在天、 及毘紐天、 大辯天神, 火神等神, 大力勇猛, 常護世間, 大力鬼王、 書夜不離。 那羅延等, 諸鬼神等, 二十八部、 摩醯首羅、 散脂為首, 百千鬼神, 神足大力, 擁護是等, 令不怖畏。 金剛密迹、 大鬼神王, 及其眷屬, 五百徒黨, 一切皆是, 大菩薩等, 亦悉擁護, 大鬼神王、 聽是經者。 摩尼跋陀、 富那跋陀, 及金毘羅、 阿羅婆帝、 賓頭盧伽、 黄頭大神, ·諸神, 眷屬鬼神, 亦常擁護, 各有五百, 聽是經者。 質多斯那、 阿脩羅王, 祁那娑婆、 及乾闥婆、 那羅羅闍、 摩尼乾陀, 及尼揵陀、 主雨大神、 大飲食神、 摩訶伽吒、 金色髮神、 半祁鬼神, 及半支羅、 車鉢羅婆、 有大威德, 婆那利神、 **墨**摩跋羅、 摩竭婆羅、 針髮鬼神、 繡利密多、 及軍陀遮、 勒那翅奢、 摩訶婆那, 復有大神, 奢羅蜜帝、 劍摩舍帝, 薩多琦梨、 醯 壓 跋 陀、 多醯波醯、 支羅摩伽、 阿伽跋羅、 央掘摩羅, 如是等神, 皆有無量, 神足大力, 微妙經者。 常勤擁護, 聽受如是, 阿耨達龍、 娑伽羅王、 目真隣王、 伊羅鉢王、 難陀龍王、 跋難陀王、 有如是等, 百千龍王, 以大神力, 書夜不離。 常來擁護, 聽是經者, 波利羅睺、 阿脩羅王、 毘摩質多, 波訶梨子、 及以茂脂、 **睒摩利子、** 佉羅騫陀, 是等皆是, 及以揵陀, 有大神力, 阿脩羅王, 常來擁護, 聽是經者, 書夜不離。 訶利帝南、

鬼子母等、 及五百神, 常來擁護, 聽是經者, 旃陀旃陀、 若睡若寤。 利大鬼神、 女等鳩羅、 鸠羅檀提, 噉人精氣, 如是等神, 皆有大力, 受持經者。 常勤擁護, 十方世界, 無量天女, 大辯天等, 功德天等, 各與眷屬, 地神堅牢, 種植園林, 果實大神, 如是諸神, 心生歡喜, 悉來擁護, 愛樂親折, 是經典者。 於諸眾生, 增命色力, 功德威貌, 變異災怪, 莊嚴倍常; 五星諸宿、 夜臥惡夢, 皆悉能滅, 無有遺餘; 如是惡事, 皆悉滅盡。 寤則憂悴, 勢分甚深, 地神大力, 是經力故, 能變其味; 如是大地, 至金剛際, 厚十六萬, 八千由旬, 其中氣味, 潤益眾生。 無不遍有, 悉今涌出, 是經力故, 能令地味, 悉出地上, 厚百由旬, 亦令諸天, 大得精氣, 充益身力, 歡喜快樂。 閻浮提內, 心生歡喜, 所有諸神, 受樂無量; 諸天歡喜, 百穀果實, 是經力故, 其華開敷, 皆悉滋茂, 園苑叢林, 香氣馝馚, 充溢彌滿; 百草樹木, 生長端直, 其體柔軟, 無有斜戾。 閻浮提内, 所有龍女, 其數無量, 心生歡喜, 踊躍無量, 不可思議, 莊嚴華池, 在在處處, 於其池中, 優鉢羅華、 波頭摩華、 牛種種華: 拘物頭華、 分陀利華; 於自宮殿, 令虚空中, 除諸雲霧, 無有塵翳, 諸方清徹, 淨潔明了; 日王赫焰, 歡喜踊躍, 照諸闇蔽。 放千光明, 止住其中, 閻浮檀金, 以為宮殿, 威德無量。 日之天子, 及以月天, 聞是經故, 精氣充實。 是日天子, 出閻浮提, 心生歡喜, 放於無量, 遍照諸方; 光明明網, 即於出時,

放大光網, 諸池蓮華。 開敷種種, 閻浮提內, 無量果實, 隨時成熟, 是時日月, 飽諸眾生。 所昭殊勝; 風雨隨時, 不失度數; 星宿正行, 豐實熾盛; 多饒財寶, 無所乏少。 是金光明, 微妙經典, 隨所流布, 讀誦之處, 其國十境, 即得增益, 如上所說, 無量功德。」

金光明經授記品第十四

爾時如來,將欲為是信相菩薩及其二子銀相、銀光,授阿耨多羅三藐三菩提記。是時即有十千天子,威德熾王而為上首,俱從忉利來至佛所,頂禮佛足却坐一面。

爾時佛告信相菩薩:「汝於來世,過無量無邊百千萬億不可稱計那由他劫,金照世界,當成阿耨多羅三藐三菩提,號金寶蓋山王如來、應供、正遍知、明行足、善逝、世間解、無上士、調御丈夫、天人師、佛、世尊。乃至是佛般涅槃後,正法像法皆滅盡已,長子銀相,當於是界次補佛處,世界爾時轉名淨幢,佛名閻浮檀金幢光照明如來、應供、正遍知、明行足、善逝、世間解、無上士、調御丈夫、天人師、佛、世尊。乃至是佛般涅槃後,正法像法悉滅盡已,次子銀光,復於是後次補佛處,世界名字如本不異,佛號曰金光照如來、應供、正遍知、明行足、善逝、世間解、無上士、調御丈夫、天人師、佛、世尊。」

是十千天子,聞三大士得受記前,復聞如是金光明經,聞已歡喜生殷重心,心無垢累如淨琉璃,清淨無礙猶如虛空。爾時如來,知是十千天子善根成熟,即便與授菩提道記:「汝等天子!於當來世,過阿僧祇百千萬億那由他劫,於是世界,當成阿耨多羅三藐三菩提,同共一家一姓一名,號曰青目優鉢羅華香山如來、應供、正遍知、明行足、善逝、世間解、無上士、調御丈夫、天人師、佛、世尊,如是次第出現於世,凡一萬佛。」

爾時道場菩提樹神,名等增益,白佛言:「世尊!是十千天子,於忉利宮為聽法故故來集此,云何如來便與授記?世尊!我未曾聞是諸天子修行具足六波羅蜜,亦未曾聞捨於手足頭目髓腦、所愛妻子財寶穀帛、金銀琉璃硨磲碼碯、真珠珊瑚珂貝璧玉、甘饌飲食衣服臥具、病瘦醫藥象馬車乘、殿堂屋宅園林泉池奴婢僕使,如餘無量百千菩薩,以種種資生供養之具,恭敬供養過去無量百千萬億那由他等諸佛世尊。如是菩薩於未來世,亦捨無量所重之物,頭目髓腦

所愛妻子財寶穀帛乃至僕使,次第修行,成就具足六波羅蜜,成就 是已備修苦行,動經無量無邊劫數,然後方得受菩提記。世尊!是 天子等何因何緣,修行何等勝妙善根,從彼天來暫得聞法便得受 記?惟願世尊,為我解說斷我疑網。」

爾時佛告樹神:「善女天!皆有因緣,有妙善根,以隨相修。何以故?以是天子於所住處捨五欲樂,故來聽是《金光明經》,既聞法已,於是經中淨心殷重如說修行,復得聞此三大菩薩受於記前,亦以過去本昔發心誓願因緣,是故我今皆與受記,於未來世,當成阿耨多羅三藐三菩提。」

金光明經除病品第十五

佛告道場菩提樹神:「善女天!諦聽,諦聽!善持憶念,我當為汝演說往昔誓願因緣。過去無量不可思議阿僧祇劫,爾時有佛出現於世,名曰寶勝如來、應供、正遍知、明行足、善逝、世間解、無上士、調御丈夫、天人師、佛、世尊。善女天!爾時是佛般涅槃後,正法滅已,於像法中,有王名曰天自在光王,修行正法如法治世,人民和順孝養父母。是王國中有一長者名曰持水,善知醫方救諸病苦,方便巧知四大增損。善女天!爾時持水長者家中,後生一子名曰流水,體貌殊勝端正第一,形色微妙威德具足,受性聰敏善解諸論,種種技藝書疏算計無不通達。是時國內天降疫病,有無量百千諸眾生等,皆無免者,為諸苦惱之所逼切。

「善女天!爾時流水長者子,見是無量百千眾生受諸苦惱故,為是眾生生大悲心,作是思惟:『如是無量百千眾生受諸苦惱。我父長者,雖善醫方能救諸苦,方便巧知四太增損,年已衰邁老耄枯悴,皮緩面皺羸瘦顫掉,行來往反要因几杖,困頓疲乏不能至彼城邑聚落;而是無量百千眾生,復遇重病無能救者,我今當至大醫父所諮問治病醫方祕法,諮稟知已,當至城邑聚落村舍治諸眾生種種重病,悉令得脫無量諸苦。』

「時長者子思惟是已,即至父所頭面著地,為父作禮叉手却住,以 四大增損而問於父,即說偈言:

「『云何當知,四大諸根, 衰損代謝,而得諸病? 云何當知, 飲食時節,若食食已, 身火不滅? 云何當知, 治風及熱, 水過胏病 及以等分? 何時動風、 何時動熱、 何時動水, 以害眾生?』 時父長者, 即以偈頌,

而答其子: 『三月是夏, 解說醫方, 三月是秋, 三月是冬, 三月是春, 三三而說。 是十二月, 從如是數, 若二二說, 一歲四時; 足滿六時; 二二現時, 三三本攝, 隨是時節, 是能益身。 消息飲食, 醫方所說, 諸根四大, 隨時歲中, 代謝增損, 令身得病。 有善醫師, 隨順四時, 三月將養, 調和 六大, 隨病飲食, 多風病者, 及以湯藥。 夏則發動; 其熱病者, 秋則發動; 等分病者, 冬則發動; 其肺病者, 春則增劇。 有風病者, 夏則應服, 肥膩醎酢, 有熱病者, 及以熱食; 秋服冷甜, 等分冬服, 甜酢肥腻; 肺病春服, 飽食然後, 則發肺病; 肥膩辛熱。 於食消時, 則發熱病; 食消已後, 則發風病。 如是四大, 隨三時發, 補以酥膩; 風病羸損, 熱病下藥, 等病應服, 服訶梨勒; 三種妙藥, 所謂甜辛, 及以酥膩; 肺病應服, 若風熱病, 肺病等分, 隨能吐藥。 違時而發, 應當任師, 籌量隨病, 飲食湯藥。』

「善女天!爾時流水長者子,問其父醫四大增損,因是得了一切醫方。時長者子知醫方已,遍至國內城邑聚落,在在處處隨有眾生病苦者所,軟言慰喻作如是言:『我是醫師,我是醫師,善知方藥,今當為汝療治救濟悉令除愈。』

「善女天!爾時眾生聞長者子軟言慰喻許為治病,心生歡喜踊躍無量。時有百千無量眾生,遇極重病,直聞是言,心歡喜故,種種所 患即得除差,平復如本氣力充實。

「善女天!復有無量百千眾生,病苦深重難除差者,即共來至長者 子所,時長者子,即以妙藥授之令服,服已除差亦得平復。

「善女天!是長者子,於其國內治諸眾生所有病苦悉得除差。」 金光明經卷第三

金光明經流水長者子品第十六

佛告樹神:「爾時流水長者子,於天自在光王國內,治一切眾生無量苦患已,令其身體平復如本,受諸快樂;以病除故多設福業,修行布施,尊重恭敬是長者子,作如是言:『善哉長者!能大增長福德之事,能益眾生無量壽命,汝今真是大醫之王,善治眾生無量重病,必是菩薩善解方藥。』

「善女天!時長者子,有妻名曰水空龍藏,而生二子:一名水空,二名水藏。時長者子將是二子,次第遊行城邑聚落,最後到一大空澤中,見諸虎狼狐犬鳥獸多食肉血,悉皆一向馳奔而去。時長者子作是念言:『是諸禽獸何因緣故一向馳走?我當隨後逐而觀之。』「時長者子遂便隨逐,見有一池其水枯涸,於其池中多有諸魚,時長者子見是魚已生大悲心。時有樹神示現半身,作如是言:『善哉,善哉!大善男子。此魚可愍,汝可與水,是故號汝名為流水。復有二緣名為流水:一能流水,二能與水。汝今應當隨名定實。』時長者子問樹神言:『此魚頭數為有幾所?』樹神答言:『其數具足足滿十千。』

「善女天!爾時流水聞是數已,倍復增益生大悲心。善女天!時此空池為日所曝唯少水在,是十千魚將入死門,四向宛轉,見是長者心生恃賴,隨是長者所至方面,隨逐瞻視目未曾捨。是時長者馳趣四方,推求索水了不能得,便四顧望,見有大樹尋取枝葉,還到池上與作陰涼。作陰涼已,復更推求是池中水本從何來?即出四向周遍求覓莫知水處,復更疾走遠至餘處,見一大河名曰水生。爾時復有諸餘惡人,為捕此魚故,於上流懸險之處,決棄其水不令下過;然其決處懸險難補,計當修治經九十日,百千人功猶不能成,況我一身?

「時長者子,速疾還反至大王所,頭面禮拜却住一面,合掌向王說 其因緣,作如是言:『我為大王國土人民治種種病,漸漸遊行至彼 空澤,見有一池其水枯涸,有十千魚為日所曝,今日困厄將死不 久。惟願大王,借二十大象令得負水濟彼魚命,如我與諸病人壽 命。』爾時大王即勅大臣,速疾供給。爾時大臣奉王告勅,語是長 者:『善哉大士!汝今自可至象厩中隨意選取,利益眾生令得快 樂。』 「是時流水及其二子,將二十大象,從治城人借索皮囊,疾至彼河 上流決處,盛水象負,馳疾奔還至空澤池,從象背上下其囊水寫置 池中,水遂彌滿還復如本。時長者子,於池四邊彷徉而行,是魚爾 時亦復隨逐循岸而行。時長者子,復作是念: 『是魚何緣隨我而 行?是魚必為飢火所惱,復欲從我求索飲食,我今當與。』

「善女天!爾時流水長者子,告其子言:『汝取一象最大力者,速至家中啟父長者:「家中所有可食之物,乃至父母飲噉之分,及以妻子奴婢之分,一切聚集悉載象上急速來還。」』爾時二子如父教勅,乘最大象往至家中,白其祖父說如上事。

「爾時二子,收取家中可食之物,載象背上疾還父所至空澤池。時長者子見其子還心生歡喜踊躍無量,從子邊取飲食之物散著池中,與魚食已即自思惟:『我今已能與此魚食令其飽滿,未來之世當施法食。』復更思惟:『曾聞過去空閑之處有一比丘,讀誦大乘方等經典,其經中說,若有眾生臨命終時,得聞寶勝如來名號即生天上,我今當為是十千魚解說甚深十二因緣,亦當稱說寶勝佛名。』「時閻浮提中有二種人:一者深信大乘方等,二者毀呰不生信樂。時長者子作是思惟:『我今當入池水之中,為是諸魚說深妙法。」思惟是已,即便入水作如是言:『南無過去寶勝如來、應供、正遍知、明行足、善逝、世間解、無上士、調御丈夫、天人師、佛、世尊。寶勝如來本往昔時,行菩薩道作是誓願:「若有眾生,於十方界臨命終時聞我名者,當令是輩即命終已,尋得上生三十三天。」』爾時流水復為是魚,解說如是甚深妙法一一所謂無明緣行,行緣識,識緣名色,名色緣六入,六入緣觸,觸緣受,受緣愛,愛緣取,取緣有,有緣生,生緣老死憂悲苦惱。

「善女天!爾時流水長者子及其二子,說是法已即共還家。是長者子復於後時,賓客聚會醉酒而臥。爾時其地卒大震動,時十千魚同日命終,既命終已生忉利天。既生天已作是思惟:『我等以何善業因緣,得生於此忉利天中?』復相謂言:『我等先於閻浮提內,墮畜生中受於魚身,流水長者子,與我等水及以飲食,復為我等解說甚深十二因緣,并稱寶勝如來名號,以是因緣令我等輩得生此天。是故我等今當往至長者子所報恩供養。』

「爾時十千天子,從忉利天下閻浮提,至流水長者子大醫王家。時 長者子在樓屋上露臥眠睡。是十千天子,以十千真珠天妙瓔珞置其 頭邊,復以十千置其足邊,復以十千置右脇邊,復以十千置左脇 邊;兩曼陀羅華、摩訶曼陀羅華,積至于膝;作種種天樂出妙音 聲。閻浮提中,有睡眠者皆悉覺寤,流水長者子亦從睡寤。是十千 天子,於上空中飛騰遊行,於天自在光王國內,處處皆兩天妙蓮 華,是諸天子復至本處空澤池所復雨天華,便從此沒還忉利宮,隨 意自在受天五欲。

「時閻浮提過是夜已,天自在光王,問諸大臣:『昨夜何緣,示現如是淨妙瑞相有大光明?』大臣答言:『大王當知,忉利諸天於流水長者子家,兩四十千真珠瓔珞及不可計曼陀羅華。』王即告臣:『卿可往至彼長者家,善言誘喻喚令使來。』大臣受勅即至其家,宣王教令喚是長者。

「是時長者尋至王所。王問長者: 『何緣示現如是瑞相?』長者子言: 『我必定知是十千魚其命已終。』時大王言: 『今可遣人審實是事。』

「爾時流水,尋遣其子至彼池所,看是諸魚死活定實。爾時其子聞是語已,向於彼池既至池已,見其池中多有摩訶曼陀羅華,積聚成[卅/積],其中諸魚悉皆命終。見已即還白其父言:『彼諸魚等悉已命終。』爾時流水知是事已,復至王所作如是言:『是十千魚悉皆命終。』王聞是已心生歡喜。」

爾時世尊,告道場菩提樹神:「善女天!欲知爾時流水長者子,今我身是;長子水空,今羅睺羅是;次子水藏,今阿難是;時十千魚者,今十千天子是。是故我今為其授阿耨多羅三藐三菩提記。爾時樹神現半身者,今汝身是。」

金光明經捨身品第十七

爾時道場菩提樹神復白佛言:「世尊!我聞世尊過去修行菩薩道時,具受無量百千苦行,捐捨身命肉血骨髓,惟願世尊,少說往昔苦行因緣,為利眾生受諸快樂。」

爾時世尊即現神足,神足力故令此大地六種震動,於大講堂眾會之中,有七寶塔從地涌出,眾寶羅網彌覆其上。爾時大眾見是事已生希有心。爾時世尊,即從座起禮拜是塔,恭敬圍繞還就本座。

爾時道場菩提樹神白佛言:「世尊!如來世雄出現於世,常為一切之所恭敬,於諸眾生最勝最尊,何因緣故禮拜是塔?」佛言:「善女天!我本修行菩薩道時,我身舍利安止是塔,因由是身令我早成阿耨多羅三藐三菩提。」

爾時佛告尊者阿難:「汝可開塔取中舍利示此大眾,是舍利者,乃是無量六波羅蜜功德所熏。」

爾時阿難,聞佛教勅即往塔所,禮拜供養開其塔戶,見其塔中有七寶函,以手開函,見其舍利色妙紅白,而白佛言:「世尊!是中舍利其色紅白。」

佛告阿難:「汝可持來,此是大士真身舍利。」爾時阿難即舉寶函,還至佛所持以上佛。爾時佛告一切大眾:「汝等今可禮是舍利,此舍利者是戒定慧之所熏修,甚難可得最上福田。」爾時大眾聞是語已,心懷歡喜即從座起,合掌敬禮大士舍利。爾時世尊,欲為大眾斷疑網故,說是舍利往昔因緣:「阿難!過去之世有王名曰摩訶羅陀,修行善法善治國土無有怨敵。時有三子端正微妙,形色殊特,威德第一:第一大子名曰摩訶波那羅,次子名曰摩訶提婆,小子名曰摩訶薩埵。是三王子,於諸園林遊戲觀看,次第漸到一大竹林憩駕止息。第一王子作如是言:『我於今日心甚怖懅,於是林中將無衰損?』第二王子復作是言:『我於今日不自惜身,但離所愛心憂愁耳。』第三王子復作是言:『我於今日獨無怖懅亦無愁惱,山中空寂神仙所讚,是處閑靜能令行人安隱受樂。』

「時諸王子說是語已,轉復前行見有一虎,適產七日而有七子,圍繞周匝飢餓窮悴,身體羸瘦命將欲絕。第一王子見是虎已,作如是言:『怪哉!此虎產來七日,七子圍繞不得求食,若為飢逼必還噉子。』第三王子言:『此虎經常所食何物?』第一王子言:『此虎飢餓身體羸瘦,窮困頓乏餘命無幾,不容餘處為其求食,設餘求者命必不濟,誰能為此不惜身命?』第一王子言:『一切難捨不過己身。』第二王子言:『我等今者以貪惜故,於此身命不能放捨,智慧薄少故於是事而生驚怖。若諸大士欲利益他,生大悲心為眾生者,捨此身命不足為難。』時諸王子心大愁憂,久住視之目未曾捨,作是觀已尋便離去。

「爾時第三王子,作是念言:『我今捨身時已到矣。何以故?我從昔來多棄是身都無所為,亦常愛護處之屋宅,又復供給衣服飲食臥具醫藥、象馬車乘,隨時將養令無所乏,而不知恩反生怨害,然復不免無常敗壞。復次是身不堅無所利益,可惡如賊猶若行廁。我於今日,當使此身作無上業,於生死海中作大橋梁。復次若捨此身,即捨無量癰疽瘭疾百千怖畏。是身唯有大小便利;是身不堅如水上沫;是身不淨多諸蟲戶;是身可惡荕纏血塗,皮骨髓腦共相連持;如是觀察甚可患厭,是故我今應當捨離,以求寂滅無上涅槃,永離憂患無常變異,生死休息無諸塵累,無量禪定智慧功德,具足成就微妙法身,百福莊嚴諸佛所讚,證成如是無上法身,與諸眾生無量法樂。』

「是時王子勇猛堪任,作是大願,以上大悲熏修其心,慮其二兄心懷怖懅,或恐固遮為作留難,即便語言:『兄等今者可與眷屬還其所止。』爾時王子摩訶薩埵,還至虎所脫身衣裳置竹枝上,作是誓

言:『我今為利諸眾生故,證於最勝無上道故,大悲不動捨難捨故,為求菩提智所讚故,欲度三有諸眾生故,欲滅生死怖畏熱惱故。』是時王子作是誓已,即自放身臥餓虎前;是時王子以大悲力故,虎無能為。王子復作如是念言:『虎今羸瘦身無勢力,不能得我身血肉食。』即起求刁,周遍求之了不能得,即以乾竹刺頸出血,於高山上投身虎前。

「是時大地六種震動,日無精光,如羅睺羅阿修羅王捉持障蔽,又 雨雜華種種妙香。時虛空中有諸餘天,見是事已心生歡喜歎未曾 有,讚言:『善哉,善哉!大士!汝今真是行大悲者,為眾生故能 捨難捨,於諸學人第一勇健,汝已為得諸佛所讚,常樂住處,不久 當證無惱無熱清涼涅槃。』

「是虎爾時見血流出污王子身,即便舐血噉食其肉唯留餘骨。爾時 第一王子見地大動,為第二王子而說偈言:

「『震動大地, 及以大海, 日無精光,

如有覆蔽; 於上虛空, 雨諸華香,

必是我弟, 捨所愛身。』

「第二王子復說偈言:

「『彼虎產來, 已經七日, 七子圍繞, 窮無飲食, 氣力羸損, 命不云遠。 小弟大悲, 知其窮悴, 懼不堪忍, 還食其子, 恐定捨身, 以救彼命。』

「時二王子心大愁怖,涕泣悲歎容貌憔悴,復共相將還至虎所,見弟所著帔服衣裳,皆悉在一竹枝之上,骸骨髮爪布散狼藉,流血處處遍污其地;見已悶絕不自勝持,投身骨上良久乃蘇,即起舉首號天而哭:『我弟幼稚才能過人,特為父母之所愛念,奄忽捨身以飼餓虎。我今還宮,父母說問當云何答?我寧在此併命一處,不忍見是骸骨髮爪,何心捨離還見父母妻子眷屬朋友知識?』時二王子悲號懊惱漸捨而去。

「時小王子所將侍從,各散諸方互相謂言:『今者我天為何所在?』爾時王妃於睡眠中,夢乳被割牙齒墮落,得三鴿雛一為鷹食。爾時王妃,大地動時即便驚寤,心生愁怖而說偈言:

「『今日何故, 大地大水, 一切皆動; 物不安所, 日無精光, 如有覆蔽? 我心憂苦, 目睫瞤動, 如我今者, 所見瑞相, 必有災異, 不祥苦惱。』

「於是王妃說是偈已,時有青衣在外已聞王子消息,心驚惶怖尋即 入內,啟白王妃作如是言:『向者在外聞諸侍從推覓王子不知所 在。』王妃聞已生大憂惱,涕泣滿目至大王所:『我於向者傳聞外 人,失我最小所愛之子。』大王聞已而復悶絕,悲哽苦惱抆淚而 言:『如何今日失我心中所愛重者?』」 爾時世尊欲重宣此義,而說偈言:

「我於往昔, 無量劫中, 捨所重身, 及作王子, 以求菩提。 若為國王, 我念宿命, 以求菩提。 常捨難捨, 有大國王, 其王名曰, 摩訶羅陀; 能大布施, 是干有子, 其子名曰, 復有二兄, 長者名曰, 摩訶薩埵; 三人同遊, 大波那羅, 次名大天。 見新產虎, 至一空山, 飢窮無食。 生大悲心: 『我今當捨, 時勝大士, 所重之身, 此虎或為, 飢餓所逼, 自所生子。』 即上高山, 僅能 還食, 自投虎前, 為令虎子, 得全性命。 及諸大山, 是時大地, 皆悉震動; 四散馳走; 驚諸蟲獸、 虎狼師子, 世間皆闇, 無有光明。 是時二兄, 故存竹林, 愁苦涕泣, 心懷憂惱, 漸漸推求, **遂至虎所。** 見虎虎子, 又見骸骨, 髮毛爪齒, 血污其口, 時二王子, 處處拼 () 狼藉在地。 心更悶絕, 見是事已, 自譬於地, 以灰塵十, 白塗坌身, 忘失正念, 親見是事, 牛犴癡心。 所將侍從, 亦生悲慟, 失聲號哭, 互以冷水, 而復得起。 共相噴灑, 然後蘇息, 是時王子, 當捨身時, 正值後宮, 眷屬五百, 妃后婇女, 共相娛樂。 王妃是時, 兩乳汁出, 一切肢節, 痛如針刺, 似喪愛子。 心生愁惱, 其聲微細, 於是王妃, 疾至王所,

```
諦聽諦聽,
       『大王今當,
悲泣而言:
              我今二乳,
       今來燒我;
憂愁盛火,
       身體苦切,
俱時汁出,
              如被針刺。
我見如是,
       不祥瑞相,
              恐更不復,
       今以身命,
見所愛子;
              奉卜大王,
願谏遣人,
       求覓我子。
              夢三鴿雞,
       其最小者,
在我懷抱,
              可嫡我心;
              夢是事已,
       奪我而去;
有鷹飛來,
       我今愁怖,
即牛憂惱。
              恐命不濟,
願凍潰人,
       推求我子。』
                是時王妃,
說是語已,
       即時悶絕,
              而復躄地。
              以不得見,
王聞是語,
       復牛憂惱,
              及諸眷屬,
所愛子故;
       其王大臣,
悉皆聚集,
       在王左右,
              哀哭悲號,
       爾時城內,
聲動天地。
              所有人民,
       驚愕而出,
              各相謂言:
聞是聲已,
『今是王子,
        為活來耶?
                為已死亡?
              為眾所愛,
       常出軟語,
如是大士,
今難可見。』
        已有諸人,
               入林推求,
不久自當,
       得定消息。
              諸人爾時,
       而復悲號,
憧惶如是,
              哀動神祇。
       即從座起,
爾時大王,
              以水灑妃,
              微聲問王:
良久乃蘇。
       還得正念,
『我子今者,
        為死活耶?』
                 爾時王妃,
念其子故,
       倍復懊惱,
              心無暫捨:
『可惜我子,
        形色端正,
               如何一日,
              不先薨没,
捨我終亡?
       云何我身,
       諸苦惱事?
              善子妙色,
而見如是,
              使今分離?
猶淨蓮華,
       誰壞汝身,
       昔日怨讐,
將非是我,
              挾本業緣,
而殺汝耶?
       我子面目,
              淨如滿月,
       遇斯福對,
              寧使我身,
不圖一日,
破碎如塵,
       不令我子,
              喪失身命。
我所見夢,
       已為得報,
              直我無情,
              牙齒墮落,
能堪是苦?
       如我所夢,
二乳一時,
       汁自流出,
              必定是我,
失所愛子;
       夢三鴿雞,
              鷹奪一去,
       必定失一。』
三子之中,
                爾時大王,
```

```
即告其妃:
      『我今當遣,
               大臣使者,
       推求覓子,
              汝今且可,
周遍東西,
莫大憂愁。』
        大王如是,
                慰喻妃已,
即便嚴駕,
       出其宮殿。
              心 牛愁惱,
憂苦所切,
       雖在大眾,
              顏貌憔悴,
即出其城,
       覓所愛子
             爾時亦有。
              尋從王後。
無量諸人,
       哀號動地,
是時大王,
       既出城已,
              四向顧望,
求覓其子,
       煩惋心亂,
              靡知所在;
最後遙見,
       有一信來,
              頭蒙塵十,
血污其衣,
              悲號而至。
       灰糞塗身,
              見是使已,
爾時大王,
       摩訶羅陀,
倍牛懊惱,
       舉首號叫,
              仰天而哭。
先所遣臣,
       尋復來至,
              既至王所,
       『願王莫愁,
                諸子猶在,
作如是言:
不久當至,
       令王得見。』
                須臾之頃,
復有臣來,
       見王愁苦,
              顏貌憔悴,
       垢膩塵污:
               『大王當知,
身所著衣,
一子已終;
       二子雖存,
              哀悴無賴。
第二干子,
       見虎新產,
              飢窮十日,
       見是虎已,
              深生悲心,
恐還食子;
       「當度眾生,
發大誓願:
                於未來世,
證成菩提。」
        即上高處,
                投身虎前。
              一切血肉,
虎飢所逼,
       便起噉食,
已為都盡,
       唯有骸骨,
              狼藉在地。』
是時大王,
       聞臣語已,
              轉復悶絕,
       憂愁盛火,
失念譬地,
              熾然其身;
諸臣眷屬,
       亦復如是,
              以水灑王,
良久乃蘇,
              號天而哭。
       復起舉首,
              『向於林中,
復有臣來,
       而白王言:
見二王子,
       愁憂苦毒,
              悲號涕泣,
涨悶失志,
       自投於地;
              臣即求水,
灑其身上,
       良久之頃,
              乃還蘇息。
望見四方,
       大火熾然,
              扶持暫起,
              號天而哭,
       舉首悲哀,
尋復躄地,
乍復讚歎,
       其弟功德。』
                是時大王,
       其心迷悶,
以離愛子,
              氣力惙然,
       並復思惟:
憂惱涕泣,
               『是最小者,
```

我所愛重; 無常大鬼, 奄便吞食; 其餘二子, 今雖存在, 而為憂火, 之所焚燒, 或能為是, 喪失命根。 我官速往, 至彼林中, 抑載諸子, 急還宮殿; 其母在後, 憂苦逼切, 心肝分裂, 或能失命, 若見二子, 慰喻其心, 餘年壽命。』 可使終保, 爾時大王, 霍乘名象, 與諸侍從, 欲至彼林, 即於中路, 見其二子, 號天扣地, 稱弟名字。 時王即前, 抱持二子, 悲號涕泣, 隨路還宮, 竦今二子, 覲見其母。」 佛告樹神: 「汝今當知, 爾時王子, 摩訶薩埵, 捨身飼虎, 今我身是; 爾時大王, 摩訶羅陀, 於今父王, 輸頭檀是; 爾時王妃, 今摩耶是; 第一王子, 今彌勒是; 第二王子, 今調達是; 爾時虎者, 今瞿夷是; 時虎七子, 及舍利弗, 目犍連是。 今万比丘, 爾時大王, 及其妃后, 摩訶羅陀, 悉皆脫身, 悲號涕泣, 御服瓔珞, 與諸大眾, 往竹林中, 收其舍利, 即於此處, 起七寶塔。 是時王子, 摩訶薩埵, 臨捨命時, 作是誓願: 『願我舍利, 於未來世, 禍篁數劫, 而作佛事。』」 常為眾生,

說是經時,無量阿僧祇諸天及人,發阿耨多羅三藐三菩提心。「樹神!是名禮塔往昔因緣。」爾時佛神力故,是七寶塔即沒不現。

金光明經讚佛品第十八

爾時無量百千萬億諸菩薩眾,從此世界至金寶蓋山王如來國土,到 彼土已五體投地,為佛作禮却住一面,合掌向佛異口同音,而讚歎 曰:

「如來之身, 金色微妙, 其明照耀, 如金山王; 身淨柔軟, 如金蓮華; 無量妙相, 以自莊嚴; 隨形之好,

光飾其體; 淨絜無比, 如紫金山; 其音清徹, 圓足無垢, 如淨滿月; 師子吼聲、 妙如梦馨— 大雷震聲, 微妙音聲; 六種清淨, 拁陵頻伽, 威德具足; 孔雀之聲, 清淨無垢, 百福相好, 莊嚴其身, 光明遠照, 無有齊限, 智慧寂滅, 無諸愛習。 譬如大海, 世尊成就, 無量功德, 為諸眾生, 須彌寶山, 牛燃愍心, 能與快樂。 於未來世, 如來所說, 能令眾生, 第一深義, 寂滅安隱; 能與眾生, 無量快樂; 能演無上, 能開無上, 甘露法門; 甘露妙法; 無患窟宅; 能令眾生, 能入一切, 悉得解脫, 度於三有, 無量苦海, 安住正道, 無諸憂苦。 如來世尊, 功德智慧, 精進方便, 大慈悲力, 我等今者, 如是無量, 不可稱計。 不能說有, 諸天世人, 於無量劫, 不能得知, 盡思度量, 如來所有, 功德智慧, 無量大海, 一滴少分。 我今略讚, 如來功德, 百千億分, 不能盲一; 若我功德, 得聚集者, 證無上道。」 迥與眾生,

爾時信相菩薩,即於此會從座而起,偏袒右肩右膝著地,合掌向佛而說讚言:

「世尊百福, 相好微妙, 功德千數, 莊嚴其身, 視之無厭; 色淨猿照, 如日千光, 彌滿虚空, 光明熾盛, 無量無邊; 猶如無數, 珍寶大聚, 其明五色, 青紅赤白, 琉璃頗梨, 如融直金, 光明赫奕, 捅徹諸山, 悉能遠照, 無量佛土; 能滅眾生, 無量苦惱, 上妙快樂。 又與眾生, 微妙第一, 眾生見者, 諸根清淨, 無有厭足。 髮紺柔軟, 猫孔雀項,

如諸蜂王, 集在蓮華; 清淨大悲, 功德莊嚴, 及以大慈, 無量三昧, 相好妙色, 如是功德, 悉以聚集; 嚴飾其身, 種種功德, 助成菩提。 令心柔軟, 如來悉能, 調伏眾生, 受諸快樂; 種種深妙, 功德莊嚴; 亦為十方, 諸佛所讚, 其光遠照, 猶如日月, 充滿虚空; 遍於諸方, 如須彌山, 功德成就, 在在示現, 齒白齊密, 於諸世界。 猶如珂雪; 其德如日, 處空明顯; 眉間毫相, 右旋宛轉, 光明流出, 如琉璃珠, 其色微妙, 如日處空。」

爾時道場菩提樹神,復說讚曰:

「南無清淨, 無上下覺, 甚深妙法, 非法非道, 隨順覺了, 遠離一切, 知有非有, 獨拔而出, 成佛正覺。 希有希有, 如來功德; 本性清淨, 如來大海; 希有希有, 希有希有, 希有希有, 佛無邊行; 如須彌山; 佛出於世, 希有希有, 如優曇華, 無量大悲。 時一現耳; 希有如來, 為人中日, 釋迦牟尼, 為欲利益, 諸眾生故, 妙寶經典。 盲說如是, 善哉如來, 諸根寂滅, 而復遊入, 無垢清淨, 善寂大城; 甚深三昧, 入於諸佛, 所行之處; 一切聲聞, 身皆空寂, 兩足世尊, 行處亦空。 如是一切, 無量諸法, 推本性相, 亦皆空寂; 一切眾生, 性相亦空, 我常念佛, 狂愚心故, 不能覺知。 樂見世尊, 常作誓願, 不離佛日。 我常於地, 長跪合掌, 其心戀慕, 欲見於佛; 我常修行, 最上大悲, 欲見於佛; 哀泣雨淚, 我常渴仰, 欲見於佛, 為是事故, 憂火熾然;

清冷法水, 惟願世尊, 賜我慈悲, 以滅是火。 世尊慈愍, 悲心無量, 常得見佛。 願賜我身, 世尊常護, 一切人天, 是故我今, 渴仰欲見。 聲聞之身, 焰幻響化, 猶如虚空, 眾生之性, 如水中月; 如夢所見。 如來行處, 淨如琉璃, 入於無上, 能與眾生, 無量快樂。 甘露法處, 如來行處, 微妙甚深, 一切眾生, 無能知者; 万 涌 神们, 及諸聲聞, 一切緣覺, 亦不能知。 我今不疑, 佛所行處, 惟願慈悲, 為我現身。」 從三昧起, 以微妙音, 爾時世尊, 「善哉善哉! 樹神善女, 而讚歎言: 快說是言, 汝於今日, 一切眾生, 皆入甘露, 無生法門。」 若聞此法,

金光明經囑累品第十九

爾時釋迦牟尼佛,從三昧起現大神力,以右手摩諸菩薩摩訶薩頂,與諸天王及諸龍王、二十八部散脂鬼神大將軍等,而作是言:「我於無量百千萬億恒河沙劫,修習是金光明微妙經典,汝等當受持讀誦廣宣此法,復於閻浮提內無令斷絕。若有善男子、善女人,於未來世中有受持讀誦此經典者,汝等諸天常當擁護,當知是人於未來世無量百千人天之中常受快樂,於未來世值遇諸佛,疾得證成阿耨多羅三藐三菩提。」

爾時諸大菩薩,及天龍王二十八部散脂大將等,即從座起到於佛前,五體投地俱發聲言:「如世尊勅,當具奉行。」如是三白:「如世尊勅,當具奉行。」於是散脂大將等,而白佛言:「如世尊勅,若未來世中有受持是經,若自書若使人書,我當與此二十八部諸鬼神等,常當隨侍擁護隱蔽其身,是說法者皆悉消滅諸惡令得安隱,願不有慮。」

爾時釋迦牟尼佛,現大神力,十方無量世界悉皆六種震動,是時諸佛皆大歡喜;囑累是經故,讚美持法者,現無量神力。於是無量無邊阿僧祇菩薩摩訶薩大眾及信相菩薩,金光、金藏、常悲、法上等,及四天大王、十千天子,與道場菩提樹神、堅牢地神及一切世

間天人阿脩羅等,聞佛所說,皆發無上菩提之道,踊躍歡喜作禮而去。

金光明經卷第四

金光明經懺悔滅罪傳

昔溫州治中張居道,滄州景城縣人。未莅職日,因適女事屠宰諸命,牛羊猪雞鵝鴨之類。未踰一旬,卒得重病絕音不語,因爾便死,唯心尚暖家人不即葬之。經三夜便活,起坐索食。諸親非親隣里遠近聞之,大小奔起,居道即說由緣:

初見四人來,一人杷棒、一人杷索、一人杷袋、一人著青,騎馬戴帽至門下馬,喚居道著前,懷中枚一張文書以示居道看,乃是猪羊等同詞共訟居道,其詞曰:「猪等雖前身積罪,合受畜生之身,配在世間,自有年限,年滿罪畢自合成人。然猪等自計受畜生身化時未到,遂被居道枉相屠害,時限缺少更歸畜生,一箇罪身再遭刀机,在於幽法理不可當,請裁。」後有判,差司命追過。使人見居道看遍,即唱三人近前,一人以索繫居道咽,一人以袋收居道氣,一人以棒打居道頭及縛兩手,將去直行,一道向北。

行至路半,使人即語居道:「吾被差來時,檢爾算壽元不合死,但 坐爾殺爾許眾生被怨家逮訟。」居道即報云:「俗世肉眼但造罪不 識善惡,但見人俗殺生無數,不見此驗交報,而居道當其凶首緘口 受死,當何方便而求活路?自咎往悞悔難可及。」使人曰:「怨家 詞主三十餘頭,專在閻羅王門底懸精待至,我輩入道當由其側,非 但王法嚴峻,但見怨家,何由免其躓頓之苦?」

居道聞之彌增驚怕,步步倒地,前人掣繩挽之,後人以棒打之。居 道曰:「自計所犯誠難免脫,若為乞示餘一計校,且得免逢怨家之 面,閻王峻法當如之何?」使人語居道云:「汝但能為所殺眾生發 心,願造《金光明經》四卷當得免脫。」居道承教連聲再唱:「願 造《金光明經》四卷盡身供養,願怨家解釋。」

少時望見城門,使人引東向入曲向北,見閻王廳前無億數人問辨答款,著枷被鎖連杻履械鞭撻狼藉,哀聲痛響不可聽聞。使人即過狀,閻王唱名出見。王曰:「此人極大罪過,何為捉來遲脫,令此猪等再訴?」急喚訴者將來。使人走出諸處叫喚,求覓所訴命者不得,走來報王:「諸處追覓猪等不見。」王即更散遣人分頭求覓巡問曹府,咸悉稱無。王即怗五道大神檢化形案。少時有一主者杷狀走來,其狀云:「依檢其日得司善報世人,張居道為殺生故,願造《金光明經》四卷依料其所遭殺並合乘此功德隨業化形。牒至准法

處分者,其張居道怨家訴者,以其日准司善牒並判化從人道生於世界訖。」

王既見狀極懷歡喜曰:「居道雖殺眾生,能設方便,為其發願條造功德,令此債主便生人路,既無執對偏詞不可懸信,判放居道再歸生路,當宜善念,多造功德,斷味止殺,勿復慳貪惜財,不作橋梁、專為惡業。」於是出城如從夢歸。

居道當說此由緣,發心造經一百餘,人斷肉止殺不可計數。

此經天下少本,詢訪不獲,聘歷諸方,遂於衛州禪寂寺檢得,抄寫 隨身供養。後居道及至當官之日,合家大小悉斷肉味。

其溫州安固縣丞妻病,一年絕音不食,獨自狂語,口中唱痛,叩頭死罪,狀有所訴。居道聞之,為其夫說:「如此之狀,多是怨家債命文案未定,故命不絕,自當思忖省悟以來由緣所問殺害身命,急為造《金光明經》分明懺唱。」此經側近無本,唯居道家有此經。縣丞依遵其教,請本雇人,抄寫未畢,妻便醒悟說云:「狀如夢惛情,常有豬雞鵝鴨,一日三過,競來咬嚙,痛不可當,從來應其到時遂乃至不見,唯有惑猪惑羊或雞之類,皆是人身,來與我別云:『雖是怨家遭儞屠害,以為我敬造功德,所以令我得化形成人,今

『雖是怨家遭儞屠害,以為我敬造功德,所以令我得化形成人,今 與怨家散,不相逮債。』語訖即去。」因爾不復如此,病即輕差平 復如本。

當此之時溫州一郡所養雞猪鵝鴨肉用之徒咸悉放生,家家斷肉人人善念不立屠行。爰及比州隣縣,聞此並起淨行,不止一家。當今所殺無所徵効者,斯是眾生業滿合死故,故無報應。只是盡其人身,還作畜生,被他屠殺。若眾生日限未足,遭人殺者,立被訟訴世人卒死,及羸病連年累月,眠中唱痛狂言或語,並是眾生執注,文案一定方始命斷。一切眾罪懺悔皆滅,唯有殺生懺悔不除,為有怨家專心訟對,自非為其條造經像,或被人所遣或事計難禁殺事不已者,當生慚愧為其傷歎。將刀所殺如割巴肉,或衒賣與人,取其財價為以豐足,皆須一本一造,分明懺唱,令此功德資及怨家早生人道。考訟自休,不復報逮。善男女等,明當誡之。

CBETA 贊助資訊

(https://www.cbeta.org/donation/index.php)

自 2001 年 2 月 1 日起, CBETA 帳務由「財團法人西蓮教育基金會」承辦,並成立「財團法人西蓮教育基金會」- CBETA 專戶, 所有捐款至 CBETA 專戶皆為專款專用,歡迎各界捐款贊助。

您的捐款本協會皆會開立收據,此收據可在年度中申報個人或企業的綜合所得稅減免。 感恩諸位大德的善心善行,以及您為佛典電子 化所做的一切貢獻。

信用卡線上捐款

本線上捐款與聯合信用卡中心合作,資料傳送採用 SSL (Secure Socket Layer) 傳輸加密,讓您能夠安全安心地進行線上捐款動作。

前往捐款

信用卡 (單次 / 定期定額) 捐款

本授權書可提供單次捐款或定期定額捐款之用途。

請於下載並填妥捐款授權書後,請傳真至 02-2383-0649,並請來 電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 授權書 (MS Word 格式)

劃撥捐款

郵政劃撥帳號:19538811

戶名: 財團法人西蓮教育基金會

欲指定特殊用途者,請特別註明,我們會專款專用。

線上信用卡 / PayPal 捐款

PayPal 是一個跨國線上付款機制的公司, CBETA 引用其服務,提供網友能在線上使用信用卡或 PayPal 帳戶贊助 CBETA。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project.

相關收據開立事宜,由於付款幣別為美元,我們除了會依您所贊助之美元金額開立收據外,另我們會依捐款當日公告匯率開立台幣收據,此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

<u>線上信用卡 / PayPal 贊助</u>

支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex-cheques, remittance, etc.,) please entitle to "The Seeland Education Foundation".